



廣州府志

ル 5
1212
47



廣州府志卷一百三十一

列傳十九

十一

門 凡 56
號 1212
卷 47



廣州府志卷一百三十

列傳十九

國朝 番禺

李豔新

方殿元

潘棣元

王隼

康衡

林桂

彭演

陳龍光

秦興岐

梁無枝

謝禹翽

鍾瓚
子獅

許遂

鄧正蒙

區錫

謝大勳
子堀

陳英畧

陳東海

陳文博

蔡中立

廣州府志

卷一百三十

列傳十九

李尙達

車騰芳

江化龍

韓海

梁觀

衛廷璞

吳孟旦

李輔政

李顯祖

子肯文

崔魁文

蘇孟起

謝元介

羅元隆

子澤 維君

衛德應

何紘

區幹先

莊有恭

叔奕洲

黃壯

衛崇陞

莊有信

凌魚

祖煙 父鐸

林誕禹

謝敦源

父陽

區充

郭雄圖

唐鑑

居允敬

次子棟華 銜

何學青

謝名鵬

潘有為

簡榮

子光輔 光國

邱先德

謝聖軒

子光輔

謝大韜

韓懋林

劉彬華

韓日進

陳廷選

凌旭升

族人壤 壤兄培

蘇鴻

區德培

從弟賢書

李則權

徐本義

呂堅

國朝

李豔新字啟中豫新豐新弟也官高州教授康熙十六年祖

廣州府志

卷一百三十一

列傳十九

二

大壽叛逼受偽職不屈乃幽囚之賊破豔新得脫

朝廷以其抗節仍官之據番禺志修

方殿元字蒙章順治甲午舉人初應禮部試往來齊魯鄭衛
吳越間見民困俗偽乃考古酌今為昇平二十書十八年至
京師欲上之值大事不果康熙甲辰成進士授江甯知縣縣
有溢溺死者胥吏輒與奸民誘挾其親誣訟富人動至破家
殿元嚴飭總甲舉報命訟頓息遭憂去服闋補郟城郟民尙
忿好鬪秋後舍其父母挈妻子就食他境親死裸葬家不設
木主殿元取朱子家禮易以里語分為四篇曰宗法曰祠寢
曰喪禮曰祭禮俾諸生習以教民又郟地苦貧民輒逃殿元
行朱子社倉法復捐俸置田三百畝以給無告者名推惠田
以前令通帑永不得調莅郟者十餘年引疾去僑寓蘇州名

其堂曰廣歌於故里置祭田百畝且以田給兄弟貧者嘗與

難賦并序云仲宣作賦尙爾依劉子山述哀猶然開府僕貧
徇五斗欲養無親家隔千山思歸何路暫棲淮水時作越吟
此邦興廢助我傷悲故國存亡求之夢卜孰相憐而可語豈
能悲而不鳴西南羈客誰非行路之難山水琴心自有知音
之聽時丁巳秋八月也嗟初生而有知分逢四海之亂離家
徙棄而不可耕兮讀先人之遺書親日老而無養兮迺通名
乎上都顧懷拙而守直兮非時人之所娛既抱關之無吏兮
效一邑之奔趨時事紛其日益兮馬步疾而加驅生芻之不
飽兮夜半躩躩而悲嘶痛菽水之不加兮憂達乎慈闈臨北
風而掩涕兮箴籠而無所之俟棄我而不我鞠兮呼吳而
弗知哀姊妹之不含兮諸弟阻乎天涯五斗之養而不得兮
不如老乎故廬死生同此懷土兮魂搖搖其安徂登高邱而
回望兮烽火接乎南陲念五羊之舊郭兮亦東南之隩區依
扶桑之高柯兮首萬象而光輝觀海波之不揚兮知聖人
之在茲擁靈洲之佳氣兮歎斯文之不衰昔尉陀之未臣兮
煩陸賈之說辭彼楊僕之樓船兮何似乎漢文之壘書歷數
朝之生息兮敦禮而明詩甲第聳其雲起兮門十五而七衢
田疇錯而沃肥兮桑麻之茶鋪時長風之南來兮貢舶鳥從
而爭飛俗文而不類兮士女繁而麗都羌百川之朝東兮獨
粵江而南趨一朝而為戮兮白骨縱橫而蔽虧吹畫角于嚴
城兮寒月慘而且孤羅美人而教歌兮哭鬼雜而相呼行
而過故里兮心迷狂以焉如尋崇臺及曲池兮唯荒榛與芘

藜秋風起于枯楊兮宜舊日之笙竽狐狸疑我而怒立兮蒼
 鷗睇我而愁啼忽白日之西匿兮燐燐熠熠而陸離鬻體而人
 語兮訴榮魂之無歸歎百年之華屋兮一旦而他人居曾年
 歲之幾何兮復存亡之不知懷骨肉而不可見兮託征鴻而
 致辭迅奮羽于雲中兮徒頤頤而差池彼羅浮之青鳥兮路
 險難而不來拾明珠而莫御兮折珊瑚欲贈誰起而待時日
 角兮鼇鼓翼于天池滯鯢鵬于涸轍兮扶搖欲起而待時日
 馳月邁使我心憂我車我馬駕言行遊北浮元武南陟牛頭
 東陵方攝西汎江流新林遠浦落星浮鷗臺城古道衰草荒
 邱鳥衣何巷白鷺空洲桃葉有渡星落無樓南臺舊地禾黍
 幽幽秋殘故苑春零御溝孝陵殿上野鹿呦呦呼龍虎而不
 應歎鳳鳥之難留倚白門之疎柳聽烏啼之咻咻尋越城而
 不見兮悵范蠡之深憂卷平吳之偉畧兮上五湖之一舟獨悲
 吟于淮畔兮想朱衣之怨愁徒埋金于大江之南兮山東起
 而國為邱哀鐵鎖之橫江兮樓船下而身囚會破曹于赤壁
 兮秣馬于荊州臨五馬之古渡兮憶江左之風流何一曲之
 後庭兮使王氣而忽收彼魏文之虎視兮歎洪濤而狐猶江
 漢東而不返兮感余心之悠悠望新亭而返轡兮山風怒而
 皆秋搖維亭之白羽撼下塚之長楸過方景之祠廟馬悲鳴
 而不留循板輿之來轍兮淚淋浪于道周返空堂而撫膺兮
 寒望為之啾啾泣南陔之風樹兮歎去國之三秋兒女不知
 愁兮學長干之里謳亂日粵山兮嶽嶽嶽粵水兮旋折荔枝洲
 今荷灼灼素馨田兮江夜月臨南海兮眺蓬關
 路不逕兮建德國與君兮心結奈何兮輕別
 著有九谷集

長洲沈德潛稱其詩高華伉爽不在嶺南三家下又著環書

究天人竅奧自成一子云子還字冀胡貢生有靈洲集次子

朝字東華有勺園集吳中二方之名傾動藝苑女潔京亦能

詩據九谷集 國朝詩別裁番禺志修

潘棣元字浣先西山人蚤有英譽以博洽聞兩以春秋中副

榜順治初總督李率泰再定西粵重其學行選北流教諭丙

辰特薦為廣州教授故事無官本郡者蓋異數也在職七年

罷歸性任俠遇人困扼必拯之李榮周王之亂香山李果奇

被掠以穀贖歸怨家首其通賊棣元時在郡司李幕密請鞫

之事遂白邑之龍灣鄉多豪族素通糧縣令誣以助亂將勤

之棣元從中調護保全千餘家周李平當事窮誅其黨兵及

菱塘巡檢婁君玉曰菱塘何罪必殺無辜請從君玉始橫身

馬前為百姓請命乃止將兵者銜之以危法中君玉棣元曰君玉不免是無天道密為營救卒復官而君玉不知也後餘黨竊發白中丞撫之百餘人束身轅門一方遂靖為教授時士之貧者賴以成就甚眾郡經兵燹後學宮傾圮兩廡為牧馬地力啟臺院修葺之為人坦易不修邊幅豪飲喜聲伎對客或臥語不起晚築西山草堂鑿池種竹既罷官喜曰吾今可以席地西山竟日酣睡矣卒年六十四著有廣州鄉賢傳義例悉本其父雲衢所定識者謂足補黃佐郡志之缺云據陳恭尹撰行狀修

謹按番禺志御史黃鶴仙與雲衢同舉於鄉年八十五自稱柱下遺史為序其書阮通志誤以柱下遺史為棣元今據行狀棣元年六十四卒尤證通志之誤

王隼邦畿子七歲能詩

王鳴雷大樽堂集序九叔說作在時隼弟斲立側輒誨曰若作衣裳爾時

佩若種礪松爾其歲春毋時俗以為雷同春毋唯諾以為取容谷口之鄭南郡之徐斯人哉斯人哉振古豈易得隼弟曰謹受命于時弟尚少比長娶潘棣元女孟齊孟齊亦能詩倡

隨枯韻雅相得也

大樽堂集潘孟齊書懷寄夫子詩慙愧芝蘭女還家恨解攜如何伯鸞婦翻作仲卿

妻星月原同影鴛鴦不獨棲隼父既甘隱隼早年亦志棲遁

自號蒲衣嘗棄家入丹霞為僧尋入匡廬居太乙峯久之返

于儒獨澆堂文集王子為武夷匡廬之游六七年而歸而學益進生而善病癯然鶴立雖酷暑猶披重裘既而結潔

廬于西山之麓者二十年為隱士之冠寬衣博帶每至城郭則人爭物色之又云王子年四十餘而孟齊謝世長子有孫

矣王子以先人之產付之挾幼子別居納徐氏女副室教以

琵琶子題其卷有曰琵琶妙手王摩詰不買鸞膠續斷琴欲

其不忘孟齊也王子愛而嘗誦之番禺志稍裕即埋書卷

手胝口沫無休時窘即彈琵琶琵琶聲急則其窘益甚孟

齊之弟聞之懷十金遺之置之凡不顧而彈益切俄而閩中

使者及粵大吏先後饋至合五百金乃舍琵琶召賓客大作

歲事分濟負親友金緣手盡卒年五十七同人私諡清逸

以為常未幾而琵琶聲復聞矣

先生其詩與陳恭尹梁佩蘭並稱大家著有大樗堂集七卷外集一卷詩經正訛嶺南詩紀琵琶楔子一卷女瑤湘亦能

詩子客僧康熙庚子舉人官雲南知州並有詩集

據阮通志修

康衡字伯孚新橋人順治八年由行伍授廣州永安門把總逾年花山賊流劫龍門衡奉委剿之屢斬獲既而入搗賊穴中礮卒龍門民廟祀焉子乃邦膺父職赴羅定剿賊事平遷開建左部兼攝守備後以母老歸養不復出

據番禺志修

林桂字斐日順治十一年以功授百夫長轉千戶康熙十九年左翼鎮總兵王忠孝薦擢都司十一月從平南將軍賴塔征雲南陞左營遊擊副忠孝為前鋒明年正月進攻石門關賊將方元勇拒守我軍少挫夜半賴塔命諸將分據要害桂與忠孝選驍勇數千從北山縋而上既踰嶺發礮擊賊我軍

四起殲賊過半乘勝蹂賊營降者二千獲輜重無算黎明告捷賴塔大喜自是倚桂與忠孝如左右手去石門關五十里曰馬斃河湍流甚駛且逼賊砦桂領千五百人夜從下流渡河忠孝領兵二千助之諸軍鼓角趨上流賊狼顧不及桂與忠孝襲其後大破之時賊將長孫德屯黃草壩福建將軍馬廣西固山劉擊之不利翼日桂獨騎偵賊道青秀山有關顯者吳逆麾下連軍也遇諸塗願從殺賊乃引桂遍示賊壘歸以告明日桂與顯誘戰賊空壁出逐至困兵谷伏起桂回戰遂敗賊斬長孫德是役也降二千五百人獲馬二千八百匹糧米一萬五千觔敘功桂第一桂言斬德者關顯也賴塔給顯守備仍屬桂部下時

詔乘勝進兵乃度蚩尤關二月駐師滇城東大將軍貝子章

泰亦由楚至駐滇城西北吳逆遣偽護國將軍馬三保約二十八日決戰屆期雞甫鳴賊擁象數十燕其尾來薄前營發強弩射之象反走蹂躪甚眾桂與忠孝率銳兵橫斷賊陣殊死戰桂提刀斷賊先鋒高虎臂射三保墜馬將成擒矣忽飛礮傷左股流血及踵裏創復戰斬賊將李大成潰圍出會貝子大軍繼至拔其砦忠孝負重傷次日卒桂亦七日不飲食疏

聞奉

旨贈忠孝同知加桂左翼鎮副將遣內閣學士額爾克圖齎人參戰袍上尊刺麻酒竝

御書著問好麼四字褒勉之時賊將馬三成與偽參軍洪文達守杏花舖及紅白廟突犯我師折千餘人明日三成復來

我師先伏東山以待桂與戰佯北三成追之伏出其背夾擊之斬首二千級三成逸去是夜大將軍命韶鎮李高揚等焚杏花舖林必選等伏紅白廟俟賊出然後縱火諸軍分伏諸路以斷賊援桂領兵三千中路擊之鼓三下杏花舖火起賊大亂文達被擒三成從紅白廟赴援桂邀之必選等既縱火趨兵躡其後三成窮急欲西走遇高揚等被創死次日即所焚地立屯堡沿滇城築長圍困之越三日賴塔病卒以桂權本帥印務時貝子議取銀錠山有將軍希佛部下楊彪者請往兵未及交而潰賊梟其首歸城偽將軍白國柱乃夜張讌饗士桂諜知之漏下二十刻請于貝子率顯等精銳三百人皆帕首著短後衣操刃持炬緣壁上值天大風草具愈熾賊殲焉俄火光徹城堞國柱驚起出遇必選等于城下大戰大

兵繼至國柱故狡銳欲突圍走步卒殆盡猶手刃數十人為
 桂射死遲明迎貝子登山徧犒軍士桂部下林必達管仲貴
 等俱授守備關顯加牛象額真易名大顯越數日進克子城
 世璠自剄死三桂婿郭壯圖自焚偽相方光琛及夏國相巴
 養元李本深趙國佐等伏誅餘黨悉降雲南平時十月丁未
 也十一月凱旋二十一年二月抵廣州進左翼鎮總兵官都
 督僉事以年老乞歸明年大學士牛鈕奏授雲南提督

旨下力辭不赴年八十餘卒于家

據海雅堂文集阮通志修

彭演字出泉鍾村人鈺子也由從化學歷仕至蒼梧道大兵
 征雲南演督運軍餉吳逆平授迤西道康熙二十二年乞歸
 坐事成聞赦還年八十二矣四十七年稱祝入都

賜硯一匣衣一襲獻詩表謝歸更六年卒著有獄中草間行

吟南征草復園紀事諸書

據番禺志修

陳龍光字雲夫傍岡人順治十三年由東莞歲貢授樂昌訓
 導缺裁補歸善以母艱去起補吳川捐貲倡建邑學并置田
 歲入穀九十石為課士需康熙六年兼權縣事時大吏議填
 海檄令築礮臺于芷寮港口以衛之龍光見地非扼要且水
 勢難成力請罷役八月巡邊主事韋某駐吳川士卒橫恣為
 民害龍光具以狀白韋督兵還伍民賴以安

據番禺志修

秦興岐字觀文南岡人順治十二年乙未拔貢康熙初知彭
 澤縣學宮祠廟橋梁倉儲諸務悉舉邑多虎為文禱城隍神
 患遂息時以比宋均後卒官有桐柯集

據番禺志修

梁無技字王顧八歲母口授唐詩百首悉能記誦十一歲以
 風箏詩知名長補諸生東莞尹源進集鄉里才俊為詩延梁

佩蘭陳恭尹次第之無技第一性敦篤道義之交無間生死

王士正朱彝尊後先至粵皆與之游其為學淹貫百氏詩文

按梁無技作羅浮歌送王又旦還都詩云不

精麗卓然名家

見海日照耀金銀房中有仙雀五色成文章

虛巖蛺蝶盤春繭孕得金鸞名鳳皇翠羽香風滿層道路絕

雲霞知者少請君拾取鳳皇絲歸作金衣獻蓬島又王士正

贈以詩無技感焉為青溪小姑曲云清溪小姑獨無郎主講

明霞縹緲鮫綃裳春風豈不惜遊冶洛浦無媒徒自傷

張府志阮通志

粵秀書院士望歸焉以明經終年八十著有唐詩截句英華

九卷南樵初集十四卷二集十一卷妹郢亦能詩有浣花草

子文冠字弋雲優貢

據張府志阮通志

謝禹翱字躍三市橋人少能文補連州生員中康熙三十二

年癸酉舉人屢試禮部不第選大名清豐縣時以雜供滋擾

禹翱至首除之輕役緩賦與民休息有鹽商藉守勢加價取

贏禹翱爭不得具文通詳復徑申計部事下大吏擬商竄流

在職三年按治豪猾不少貸卒以抗慢去官縣民號哭攀轅

數十里歸橐蕭然杜門講學為文崇尚先正持論甚嚴詩多

幽鬱骯髒之氣工書人爭寶之與高式任蔡章交厚稱番禺

三孝廉云

據番禺志

鍾瓚字勺金蘿岡人父旦卿母周以節著督教瓚甚嚴瓚故

不以孤廢學然試輒困以貲為國學生九赴鄉試終不售乃

卜宅羊城南負郭而居顏其堂曰獻玉堂環植緋桃集詩人

唱和其中以諸人前後題詠數百篇編為獻玉堂集并所著

蘿山草堂集刊行子獅字作韶雍正元年癸卯舉人乾隆元

年丙辰薦試鴻博二年成進士出知河南靈寶縣引疾歸重

興壇坫有鐵橋詩集二卷

據東皋文集粵臺徵雅

許遂字揚雲潭山人康熙三十五年丙子舉人性警敏讀書

廣州府志 卷一百三十一 列傳十九

淹貫為文豪放自喜尤長于詩授清河知縣綜理殷繁肆應不迫力請上官蠲逋賦凡興作便民者輒為之在官五年以事望吏議歸杜門著作名益起雍正九年與修通志乾隆元年開鴻博科巡撫楊永斌薦之格于部議不得與試還過清河清河人士留讌者久之江甯都院某合先後被論者二十五人上其名于部起用者七人而遂仍放歸蘇巡撫楊某又欲以治河薦會內遷去事遂已遂詩格律高古得太白神似復以雄麗浩衍之學濟之自成一家言年七十六卒著有真吾閣前後集族子振華亦以詩名著有近山樓集

阮通志郝志修

鄧正蒙字聖涵明經人舉康熙三十五年丙子鄉試官山西懷仁知縣馭吏民有方追呼不擾值亢旱祈禱必應民甚安

之視事七載以老歸督學使院舊在育賢坊試時地狹人不

能容正蒙與陳英畧等倡遷九曜坊不仰藉官帑卒成之居

家不干外事至族郇有構訟者必力為排解云卒年九十二

著有禺山集二卷

據番禺志修

區錫字元夫康熙三十八年己卯舉人直隸元城知縣悃悞

無華留心吏治兼理河道分府措理裕如後卒於任士民懸

扁于堂曰忠愛堂按察使楊名時廉其治行復製薊北棠陰

匾以表之

據番禺志修

謝大勳字亮儀市橋人父岳侶抱隱德大勳歲貢生事繼母

蘇竭誠色養事長兄如父從兄貧而天為擇繼營田宅而婚

娶焉弟婦孀居不能自養鬻其少子勳求而返之當選教諭

丁內艱遂不出以祿不逮養也子垆字靈川弱冠負文名雍

正十年壬子舉人乾隆二年丁巳進士選北流知縣抵任卽以興利除弊爲務凡糧稅印帖諸陋規悉裁汰之縣有稅廠巧宦者藉以飽橐一洗前轍捐俸修學宮建銅陽義學置租二百餘石爲膏火需教民製龍骨車以備旱歲饑復捐俸未幾引疾歸年六十七卒

據張府志阮通志番禺志修

陳英畧字韜子赤山人淹貫經籍肇慶府歲貢生平于人無忤及遇事可否毅然持正敦倫篤行爲鄉人矜式初爲大埔教官黜浮崇實士翕然從之後補石城教諭陞廣州府教授課士一如大埔時康熙癸巳歲饑捐俸賑其鄉人秩滿陞慶元知縣未赴任以疾卒于京師

據張府志修

陳東海少尙氣節以貢官始興教諭學吏素輕侮諸生東海懲以法士氣始振改陽穀縣丞值水患佐縣賑恤民賴全活

歷署朝成縣東平州慈威並著人多稱之

據張府志修

陳文博字錫曉石樓鄉人康熙四十四年乙酉舉人初爲欽州學正捐俸倡修學宮有賄求舉優者却之日率諸生講學州之天涯亭遷南雄教授士感教澤勒石紀焉秩滿舉知縣以年老辭歸卒年八十二有景堂集

據番禺志修

蔡中立字卓行螺山人補雷州諸生康熙中以貢官從化教諭設規程以課士十餘年謝歸邑有興創必首舉其事白于官鄉里以曲直就質者剖判之咸愜心去歲飢捐米以賑又恤孤寡濟死喪建義祠義塚爲之恐不及云

據番禺志修

李尙達初名若澍字湛師宋昂英二十七世孫居市橋穎異好學由花縣學中康熙四十七年戊子舉人

番禺志選舉作五十二年郝志

作孔上達本姓李阮志同乾隆四年授山西興縣知縣甫莅任盡革前陋

政歲飢捐俸倡賑存活甚眾民勒碑以頌三載謝歸年七十

二卒

據采訪冊修

車騰芳字圖南蓼浦人父兆龍有至性時粵地初定海氛未息兆龍隨其親避地採薪拾枵朝夕不倦母高亦賢以紡績佐騰芳讀騰芳生秉異質于書無所不窺而其學粹然一出于正每出授徒旬日即歸省康熙五十九年庚子舉鄉試乾隆元年丙辰薦試鴻博以親老辭知縣親為勸駕至京後期不得與試歸主講邑學後仕海豐教諭在官七年乞休卒年八十四為人清介辭受不苟知縣龐嶼與厚善每晤談竟日未嘗干以私既嶼官嵯使有鹽商以多金賂騰芳乞為之請騰芳拒之嶼聞舉卮酒謂曰子敬君直至毫髮前有欲賄君者信乎騰芳微笑終不肯言新會何震有宅城南及老將歸

以宅為贈騰芳固辭焉督學吳鴻雅重之嘗詢曰君兒孫補

諸生否曰諸兒失學皆散材耳鴻歎其誠著有螢照閣集十

六卷生平無妄交惟與蔣泰來相善泰來字拔士和厚樂善

恂恂惟謹長者也

據番禺志螢照閣集序
粵臺徵雅錄阮通志修

江化龍字尙客江村人讀書屢試不得志乃棄筆硯從軍康

熙五十二年

番禺志作
六十一年

尙書趙申喬使粵奇化龍拔為列校

雍正二年

詔選郡國材官化龍時官澄海守備用薦入都充

御前侍衛五年補閩浙楓嶺營遊擊七年擢福州提標參將

十三年陞副將兼權督標中軍時青鋪鹽匪跳梁化龍提兵

往羣匪宵遁旬月間得其魁置于法脅從者宥之事平攝漳

州總兵乾隆五年臺灣島番謀逆大吏才化龍奏堪邊寄授

臺灣北路副將抵任臬番帖然旋署金門鎮總兵以疾辭總督那蘇圖留之九年授汀邵延建等處總兵化龍少習兵法有雄畧由行伍起家御下有恩而紀律嚴明尤耐煩劇有事輒以身先歷官數十年險夷一致前後

賜賚無算以老致仕青鞋布襪風致儵然見者不知其為舊

將軍也年八十一卒

據阮通志修

韓海字緯五官橋人僑居郡郭之東少敏穎嗜學好問工聲律為鄭際泰梁佩蘭所知性孤介授徒富人家以坐位小失拂衣歸至乏食無悔雍正元年癸卯舉于鄉十一年癸丑成進士官封川教諭鴻博之舉制軍鄂彌達撫軍楊永斌欲首薦海海賦夏蓮詩有欲待移根歸太液須尋十丈藕如船句乃不果薦著有東臬詩文集弟彪從兄瑤五俱名諸生族兄

嘉謀嘉謀子鵠並有詩名嘉謀有復初集鵠有止亭詩鈔王

祖字日永縣生員亦舉鴻博不就著有柳塘集

據粵臺徵雅錄陳東臬詩

集序番禺志阮通志粵東詩海修

梁觀字拜公坑頭人性孝友事親不違色笑撫愛兩弟甘苦

常與同早慧十一歲能屬文雍正元年癸卯舉于鄉年七十

一選四川屏山知縣久處田間知間閭疾苦抵任嚴設條教

猾胥蠹役不敢舞弊上下文書皆手裁不延幕客視事兩載

民咸畏服告老歸卒年七十八

據番禺志修

衛廷璞字嶽瞻瀝滯人雍正元年舉鄉試二年成進士選江

南建平知縣凡大小政務必躬親不假他人手聽訟不用刑

虛心研鞫多得實胥吏舞文詐取人財立置諸法事苟便民

者雖上司嚴飭不肯徇有官田由佃戶收穫納稅相沿已四

百餘年藩司疑縣官沒入私橐欲立官戶割稅廷璞力爭藩司謂曰始終掩過不畏參揭耶廷璞曰縣自應効第自前明永樂以來官此者皆當効耳藩司乃止時各縣以報墾多者考最廷璞念以建平多虛稅計所報盡抵之無可抵乃申報其惠民多此類也辦漕則寢食于倉厥察閱斛面吏不能爲奸陋規向有紅帽減存壽禮繩袋門包公廨水腳諸名色鹽典諸商亦有壽節禮悉屏除之俗好唆訟盜葬移屍積成惡習廷璞發奸摘伏弊遂革履任十年捐俸置藉田立壇屋建節義祠修城垣賑水災絲毫不累民民愛之爲立石焉乾隆元年部例行取制府趙宏恩撫院趙國麟首薦廷璞授禮部主事擢員外郎歷科道兩充會試同考官十一年十二月兩次

賜宴瀛臺廷璞皆與時以爲榮十五年補太僕寺少卿以累誤降鴻臚寺少卿十七年假歸二十二年

南巡廷璞至江蘇獻詩冊二十三年卒于家年七十二著有窺巢稿妄蠶草廷璞在臺諫時務持大體嘗因歲飢官復採買米益貴奏言米價驟長民力難支遲久不減民力逾困民力既艱採買匪易公私交困故有踰期未足額者有原價不敷請加增者部臣未便允行國計民生均無裨益乞撥運收賑俟元氣稍復再行採買原定價值亦應酌增從之又以粵大吏請于廣州等處開礦奏言聚礦場多無業游民良楛混集以二百餘處計之不下十萬餘人粵東山海交錯尤難稽查不可不慮部議韙之其餘疏陳多可採者從弟廷洪有文名以諸生終

據筠園年譜阮通志番禺志修

吳孟旦字旭亭雍正元年拔貢言動必以禮其學博采師友
聞一善趨若不及為學使惠士奇所知與順德蘇珥羅天尺
南海何夢瑤陽春謝仲杭遊尤心折胡方手錄方著述殆遍
方傳謂士奇見方以吳生介即孟旦也士奇既罷官貧甚所
居質它氏孟旦至吳率同人醵金贖還之間士奇訃為位哭
心喪三年其篤于師門如此官仁化教諭七年解組歸率族
屬建家廟授徒自給晏如也卒年八十弟秋字始亭嘗受業
于婦翁胡方與羅天尺何夢瑤蘇珥陳世和勞孝與陳海六
吳世忠並為惠士奇所賞拔有惠門八子之目秋于八子中
年最少早卒何夢瑤哭吳始亭詩云同學數十人惟君年最
少詩筆獨秀出爛漫啟秘突婦翁胡明經絕學
程朱紹遜世誰見知韜光祇自照薦雄我何功遺文君自校
水玉遙相映堂階日深造尚憶紅豆齋立雪同絳幃竹君遠
千竿石丈拜九曜風吟水面來醇醉婪尾醜朋簪甯久盍萍
跡詎預料何意西瀧水遠泛剡溪權亟叩別後得不覺相視

笑侯生時在座探奇愜所好文繡陳思虎物博終童豹胸噴
訪殘碑瑯琊釋疑稻共訝洗馬博似勝樂合與鱗門遜高足
雁翅愧二妙方劇文字飲忽鼓將歸擢何物回頭瘴竟等終
風暴傷哉梁木萎倏若隕籜掃崔經失腹筭曹書徒石窖誰
復傳薪火從此紛螢燭重為斯文憂益增良友悼客窗吟夜
雨雙淚如懸瀑倚竹湘靈悲吹燈山鬼嘯四顧寂無人悽惻
不可其羣從有鏗函者以詩鳴鏗字調可著綠蔭堂詩鈔函

字充可廩貢生嘉應州訓導所作多散佚云粵臺徵雅錄吳
氏其先由閩遷

粵居慕德里陳田村遂占籍焉再傳遷會城西郭之繡衣坊
世稱繡衣吳氏 據阮通志粵臺徵雅錄翁芳園詩集嶺南
修詩鈔

李輔政字匡君石壁人四歲而孤母他適欲與俱撻之不從
留獨居七歲過祖祠聞塾師講授悉記之則聚羣兒高坐效
其語以為戲塾師聞羣兒噪將驅之見輔政狀異焉講四書
一章復之不遺一語乃令詣塾讀讀時藝一首即能為學詩
出口新穎至人家見有異帙輒取覽十五歲赴試例搜檢恥

而去之許遂重其才延歸課子禮偶愆即告辭乾隆元年舉
鴻博遂言于郡守見之輔政度守意嫌其喬野遁歸平居持
躬甚肅坐立無跛倚為詩文不起草書法仿諸家無不肖畫
山水人物俱有別趣年三十二竟卒未娶無子詩文散逸不

存據番禺志

李顯祖字坦之鍾村人雍正元年癸卯舉人十一年癸丑進
士授戶部主事外補得四川合江縣性鯁直狷介苞苴屏絕
大小務悉親決吏役不能為奸日接里老問疾苦教農桑民
或因事到官諄諄誠諭相接如家人有監生以女許某後聞
其貧賂顯祖三百金求斷離顯祖曰爾金曷不與某而與我
耶立集訊更罰監生金為婚費在任十餘年民愛之護理瀘
州甫半載以老歸子肯文字慶冠少穎敏過人于書不再讀

雍正十年壬子舉鄉試乾隆二年丁巳成進士授浙江龍泉
知縣縣民健訟獄多數十年不決者肯文至判狀三百無不
受理積案一空豪猾斂跡調秀水縣旋卒官年四十八顯祖
父子從仕二十餘年囊無長物俱以廉吏稱于世云據番禺志
崔魁文字升良員岡人雍正元年年六十始受知惠士奇補
南海學諸生是年即舉于鄉居鄉以整飭風俗為務戒徵逐
禁賭博尤嚴懲打降之習不率則聞之官里黨為肅生平關
佛法有名士為僧作募化文謂曰吾儒屢空會不開口向人
顧乃代沙彌乞食耶著有古文粹十卷一山詩集四卷據番禺志

謝元介字作大大田人由東莞學舉雍正二年甲辰鄉試居
會城之東山喜填詞善詩與許遂韓海車騰芳輩相唱和家

貧授徒館莊氏最久有恭兄弟皆從之遊十三年充福建鄉試同考官乾隆六年卒年五十八著有東麓詩文集

據番禺志修

蘇孟起西江人補龍川學諸生讀書務博不求甚解文簡樸奇古家貧落魄為人傭書嘗哀衣大袖行吟田野羣小兒譁逐其後怡然自得人以爲狂雍正四年歲飢米騰貴有旗卒走訴大吏怒命縛之坐以亂民將軍李爲營解并中李以法去之孟起號于市曰真將軍也奔送至百里外及旗卒就戮時攜隻雞絮酒朗吟所作輓詩生祭之都邑咸曰蘇生不狂也

據番禺志修

衛德應字同侶瀝滯人天性伉爽落落不苟合博聞強記五官並用父歿于所嘗坐臥處設几置茗事之如生遇諱日輒素服不出事母晨夕問安事無鉅細必稟命兩弟尙幼置田

產悉與均補南海學生員雍正四年丙午舉于鄉七年分校西粵鄉試所取多知名士乾隆二年丁巳成進士未幾卒族人尺木字殿枚亦補南海諸生雍正二年副貢居恆無他好惟專力于詩古文詞教授鄉里經指授者多成就年四十五卒

據番禺志修

羅元隆蓼涌人邑諸生負幹畧邑令姚炳坤以縣煩劇難治歷任每以通糧鑄級乃訪催科法于元隆對云功令輸糧以夏中而半冬初而終雖旬判而三旬三而遍然計邑百餘圖圖統甲者十甲統戶且數十以三之一言之圖之十其甲者約五十則戶且萬餘矣合萬餘戶而并責之人眾則易誘事冗則難支不若戶析而三甲析而十其甲則十其三始于二月初吉旬日而代積十旬而圖以週週而復始總三十旬

而畢畢則給賞有絲勺遺則罰罰賞皆出諸首領而官坐享其成至賞罰之不恤而後官法臨之令從其言一年而舉五年之逋然其後逾歲者仍有十之四後令龐嶼使問元隆曰向法責在胥役役受撻者索值于民數十民而賄一役輕不著痛癢也役以受撻得賄為利愈不著痛癢移其責于欠戶則富民力有餘不敢冒撻貧民欠無幾亦不願冒撻也嶼從之自是邑無逾歲之糧云子二澤字瑞仲充順德學生員雍正四年丙午舉人為潮州教諭性剛毅約束鄉里人多畏服維君字瑞叔雍正十三年乙卯舉人龐嶼升廣西運使維君館其署數年著有西語二卷據番禺志修

擢湖南永明知縣永明俗多溺女幹先嚴其禁令鄰里出首以故殺子孫律律之民乃不犯縣境近九疑山數患虎幹先懸重賞募戶設法殲之倡修邑學建復南洲百子兩橋輿情大浹陳宏謀撫楚察幹先有實政特嘉之後以老乞休卒上同何絃字冕調大石人雍正十三年乙卯舉人乾隆二年丁巳十年乙丑會試兩舉乙榜官永安教諭十三年戊辰成進士以母老仍就教職補惠州教授為文學老蘇有先秦風格耽于詩尤工近體輿到濡毫未嘗起草所刻密村集皆未第時作視晚年雄深雅健判若兩人惜手定全藁及韻府補遺諸書皆藏猶子家後起無人盡飽羽陵之蠹矣時天下承平吟社徧粵中請絃品題者無虛日書喜瘦硬不拘古法人有索之者窮日力不以為疲也初沈德潛選

國朝詩為別裁集其人存者不錄惟絃方官惠州而詩儼然列其中絃為沈戊辰所取士得名又最早蓋誤收之耳性疏朗士請謁者不計脩脯之人遇寒峻輒周之故惠人士到今思之

據番禺志粵臺徵雅錄采訪冊參修

黃壯字允紳沙亭人乾隆元年丙辰舉人七年壬戌進士需次選溫縣知縣改教授補瓊州太守聞其賢延主講義學俸滿歸授徒自給不涉外事從遊者日多講舍至不能容同時林達字亮采市橋人由貢生選授長甯訓導兼攝教諭雅意作人庠士敬之卒于官

據番禺志修

莊有恭字容可父奕仁名承輔以字行本福建晉江人偕弟奕洲遊粵因家番禺為人孝友豪爽能周人急喜結納名流子七人有恭其次也生而穎異十三通五經以拔貢生考授

宗人府教習乾隆戊午舉順天鄉試己未一甲一名進士授翰林院修撰入直南書房五年分校順天鄉試六年弟有信成進士同請假歸還朝遷右中允進侍講學士擢光祿寺卿丁父憂在籍升內閣學士兼禮部侍郎銜服闋入都遷兵部右侍郎十三年提督江蘇學政十五年轉戶部右侍郎召還供職尋充江南正考官再視學江蘇十六年除江蘇巡撫蒞事六載書接見僚屬夜治文書或至漏盡不少休十八年夏秋之交淮陽諸郡水親往察勘撫卹

詔截漕百二十萬石發帑銀五百萬兩以備賑濟民乃得蘇二十二年大江南北復以災告有恭草奏自言奉職無狀數干天和并陳諸救荒之策

上皆允行費內府白金凡千餘萬督率屬吏檢視給散胥役

不得侵漁二十一年夏民多病疫首捐俸令有司察民病者
子藥死者予槥并檄屬內推其法行之擢江南河道總督時
丁內艱扶櫬南行未之任以在蘇日罰贖事失當番馬志作
不先舉劾

朱相逮繫法司論如律

特恩貫罪令護喪還籍後赴軍臺自劾方詣謫所中途授湖

北巡撫番馬志云
在任守制歲餘調江蘇未行復調浙江浙西三郡以

風雨蟲傷米價騰踊而江南亦歉商販不至有恭奏請動司

庫銀二十六萬委官往湖廣買米

上命留湖南漕米十五萬石并碾倉米五萬石運浙糶濟自

冬徂春米之來自楚者舳舻相望分撥諸郡減直以售歲雖

儉而民不飢錢塘江入海之處有三疊曰南大疊曰中小疊

曰北大疊九年以後水行中疊者十餘年二十四年改趨北

大疊有恭承

詔抵海甯閱柴石塘登尖山渡江周遭履勘者再以購芻薪

加築土堰添建坦水為請既而水勢直齧塘根以有備得無

患又奏復海塘兵專司負薪運土磬石下橋設守備一員千

把外委十二員分界防守省民夫無算海甯之老鹽倉向以

土活沙浮祇立柴塘二十七年

聖駕南巡議改石塘

命大學士劉統勳兩江總督高晉與有恭先往察勘果以活

沙不能立椿

上復親歷隄上指示形勢令修柴塘增坦水加薪價有恭承

命鳩工庀材刻期藏事又用前人竹絡之法編竹為簾實以

巨石鱗次櫛比以衛塘根其秋風潮大作石塘間有潰裂而

廣少府志卷一百三十一
柴塘獨得無恙是時秋霖後水漲久不退親勘嘉湖兩郡知
太湖下流及水歸太湖之道多淤因請浚烏程長興境內七
十一澗并遣官至江南按行三江故道疏入尋調江蘇巡撫
加太子少保踰年擢刑部尙書協辦大學士仍留辦巡撫事
有恭于調蘇之始卽親往探尋脈絡得其要領建議大修三
江水利具摺入告其畧曰太湖北受荆溪百瀆南受天目諸
山之水爲吳中巨浸而分疏之大幹則以三江爲要三江者
吳淞江婁江東江也東江自宋已湮明永樂間別開黃浦寬
廣足當三江之一今亦謂之東江三江分流經吳江震澤吳
元和崑山新陽青浦華亭上海太倉鎮洋嘉定十二州縣之
境其間港浦縱橫湖蕩參錯大概觀之無處不可分洩似亦
可安于無事然百節之通不敵一節之塞數港之洩不及一

江之壅其勢必有所阻查太湖出水之口不特寶帶橋一處
如吳江之十八港十七橋吳縣之鮎魚口大缺口爲湖水穿
運河入江之要道今亦不無淺阻又如入吳淞之龐山湖大
斜港九里湖澱山湖激浦向稱寬深足資宣洩者邇來小民
貪利徧植芡蘆圈築魚蕩亦多侵占劉河古之婁江也今河
形大非昔比舟楫來往必艤舟待潮崑山外濠爲婁江正道
淺狹特甚蘇州之婁門外江面僅寬四五丈偶遇秋霖眾水
匯集江身淺窄先爲潦水所占俟其消退然後湖水得出爲
之傳送而上游已淹漫矣東南財賦重地水利民生大計若
及早治之事半而功實倍今籌所以治之之法當于運河以
西凡太湖出水之口皆爲清釐占塞俾分流無阻其運河以
東三江故道惟黃浦見在深通但于泖口挑去新淤蘆墩三

處足資宣洩其吳淞江自龐山湖以下婁江自婁門以下凡有淺狹阻滯之處宜溶治寬深令上源所洩之數足相容納其江身所有植蘆插籬及冒占之區盡數剷除嗣後仍嚴爲之禁則水之停蓄有所傳送以時並卽以挑河之土加培墟岸見有厝座去海太近難于啟閉者酌量改移庶渾潮不入清水盛強而海口之淤亦將不挑而自去總計所需雖覺浩繁然散在十二州縣通力合作實亦無多民間聞有此舉咸樂趨事願以民力爲之但分段督修仍須官董其成且工費繁多若待鳩集財力而後興工不無稍稽時日仰懇

聖恩准予公項內先行動支興工仍于各州縣分年按畝徵還則民力旣紓工可速集奏入報

可于是選紳耆賦工役先疏橋港次及河身茭蘆魚蕩圈占

者除之城市民居不可毀者別開月河以導之工始二十八年十二月至二十九年三月告成凡用白金二十二萬有奇迄今八十餘年吳淞無水患三十年冬入都供職未幾坐劾段成功事逮問訟繫半載復授福建巡撫抵任誠族人居晉江勿至省卽至遣門者謝之曰我爲封疆大臣嫌疑當避且俟去此之日再相見也三十三年七月卒于福州年五十五有恭識度閎遠材任公輔東南重地膺委寄者十餘年自登巍科以至參大政皆荷特擢海內士夫識與不識無不歎科目得人之盛平居好吟詠日有程課書法圓勁出入顏平原趙吳興之間片楮隻字人爭藏弄經進詩文數承

上獎

南巡幸嘉興烟雨樓令至行營給札聯句詩成書以勒石知
遇之隆羣臣莫及焉奕洲亦有義行葬枯骨賑饑云據錢大昕潛研

堂文集番禺志舟車
間見錄阮通志修

莊有信字任可少與仲兄有恭競爽人稱禹山二莊由鶴山
學舉乾隆辛酉鄉試壬戌成進士改庶吉士授編修十五年
典試山右稱得人出知南陽府地方利弊務與興除民賴以
安詳毀古寺改建宛南書院仿安定經義治事法分敦仁集
義復禮達智四齋設膏火延名宿主講席一時士爭淬厲郡
人為建生祠有信不可令以所釀金重修漢太尉鄧禹廟以
禹曾莅南陽有功德于民也十八年擢山西冀甯道兼攝臬
事嘗鞫紅蓮教案株累者多超釋又汾隄水漲相度形勢培
隄捍禦水不為災太原有烈女祠當事議毀為公所有信曰

毀烈女祠何以勵俗乃止嵐州被災發倉賑之然後申詳厥
土性寒八月即不再種有信教種蕎麥冬民得大收丁繼母
憂歸未幾卒年四十五弟有昌字世可乾隆庚午舉人選直
隸萬全知縣縣為宣府極邊西當軍營要衝差使絡繹且民
風剛勁號難治有昌辦理裕如碧大寺僧普明普洽潛倡邪
教造逆書煽誘愚民訪擒正法餘皆省釋二十八年山水陡
發大境門石隄壞六十餘丈詳請修築復修張家口營房三
千餘間每間捐金添設草簾以禦風雨加捐直隸州知州戊
子選四川忠州以赴任逾限部議降調

詔復原官權會理州事卒于官年四十六有德字純可乾隆
丁丑夏饑賑米數月己卯春疫散給丸藥死者助之棺其善
事固不可勝紀也族孫心省道光壬辰進士官戶部郎中軍

機章京心庠心省弟道光丁未進士官湖南江陰等縣知縣

有政聲據番禺志采訪冊修

衛崇陞字擢臨瀝涪人父焜耀邑諸生崇陞生而聰慧六歲能問奇字稍長默誦五經乾隆六年辛酉舉人七年成進士需次十載選直隸新河知縣改江西進賢留心吏治耐煩劇十八年鄉試分考稱得人會湖北逆民馬朝柱等構亂其黨有散匿進賢者巡撫獲之崇陞坐失察免官已而事平上官惜其才子開復崇陞以母老子殤遂辭歸進賢民思之據番禺志

粵臺徵雅錄修

林誕禹字澤相嶺德人讀書數行並下性寬坦無崖岸無少長皆親敬之弱冠試縣府督學皆第一中乾隆十二年丁卯舉人十九年甲戌成進士改庶吉士授編修武進錢維城仁

和吳鴻饒平詹肯構皆與善乞假南歸未一載卒年三十八

著有玉堂賦草德川文鈔兄誕陽能詩擅詞曲嘗作悼懷詩

十八章輓之據番禺志

凌魚字滄洲凌邊人祖煙深于焦氏易著易書占多奇中父鐸字鳴遷性和平有侮之者弗與較嘗被竊即親見其人亦不之責也魚舉乾隆丁卯鄉試戊辰成進士分發湖南知縣歷任桂陽昭陵醴陵諸縣廉介明敏治事若不經意而案無留贖在桂陽政暇輒進諸生講經義而嚴課試之文風丕振宦十餘年所至有遺愛後歸養大母遂不出以讀書敦行教其鄉續修縣志考核詳明著有書耘齋前後集據番禺志粵東詩海郴州志名宦傳朱文正滄州遺文序阮通志修

謹案番禺志云乾隆三十八年知縣任果主修邑志

魚與望江進士檀萃任總纂其任分纂者豫章生員
鄒懋相及邑舉人簡榮候選教諭莊有豫崔錕士凡

八閱月而事竣茲增修新志正承其後謹附識于此

區充字汝琇韋浦人乾隆十五年庚午舉人十九年甲戌會
試乙榜授惠來教諭調感恩俸滿擢陝西麟遊知縣有劇盜
數十人嘯聚密林深箐間前官姑息盜愈橫充理論勢禁旬
月皆散去又詳免歷年軍需外雜派及月料等銀民齋五百
金為壽却之在任八年興學校勸農桑為作歌曰仁明我公
分符麟趾我公來遊四境迺理政以簡成民無殿屎蠲去雜
差徭役不起化洽八年風清百里永矢勿諉父母孔邇因鐫
石立之縣署後以病歸卒年六十一先是巡撫王安國留意
造士嘗捐俸買經史及伊洛淵源錄朱子全書置粵秀書院

中又手自點定四書大全令署糧道薛韞不時到院試諸生

講誦時邑中同肄業者林誕禹入翰林充以庚午屈江以壬

申何平以癸酉俱舉鄉試惟林鳳翔以廩生終江字澄波沙

亭人少靜默能文好朱子書事親接物皆有至性云據番禺志修

謝敦源字容谷市橋人父陽字始一邑廩生事親承顏論志

與人交坦易無城府歲饑眾售祖祠分賑陽力止不得乃與

弟配國馨數年所積贖歸敦源少孤孝于母友愛幼弟中乾

隆二十四年己卯舉人明年成進士選庶吉士才情清綺詞

賦最工尋以事歸班負才無所見日從布衣野老遊酒酣高

詠跌宕不羈年三十八卒著有清麗集二卷據番禺志修阮通志

洪瑞元字景清篤學敦行事母至孝授經羊城晨夕必歸定

省寒暑無間乾隆三十三年戊子中舉人一上公車以母老

不再赴說經宗漢學詩古文辭翹然為一時文人冠性和而介非公事不入官府母卒久之始謁選作詩云出山雖小草志比在山堅補山東鹽大使卒于任宦橐蕭然著有雲在山

房詩鈔六卷

據阮通志修

郭雄圖字丕遠市橋人家貧力學事親孝親喜濟人授徒有餘資輒承親志恤鄰里乾隆三十九年甲午鄉試舉第一石碁土匪梁阿香聚黨為盜肆出劫掠巡撫李湖率師道市橋勦捕鄉人懼老幼逃散雄圖獨出迎巡撫素重雄圖與之會商雄圖為分別良莠于是善類安居凶人授首閭里德之後選西甯教諭調大埔值歲饑出財粟為賑教育諸生不倦又

遷羅定州教諭事關風教者無不行之

據番禺志修

唐鑑字金益小亨人十二歲補生員學使吳鴻器之有神童

之目乾隆戊子舉人辛丑大挑分發福建時臺灣將蠢動撫軍尙青田由粵蒞閩欲得人入臺探之鑑請行撫軍壯之遣鑑謁提督海澄公黃仕簡于漳州令率兵從廈門入澎湖鑑語仕簡曰行軍之道在先聲奪人今臺灣未知大軍之動盍先施大礮使聞之駭散乎從之賊果逃匿不敢出癸卯二月委署臺灣縣知縣臘月署北路理番同知調署諸羅縣諸羅當南北之衝鑑撫凋殘平反側月至村落痛哭曉諭民亦泣丙午七月新任董啟埏至鑑以交代未即行時有榜於通衢言某日當殺官吏者教諭某告鑑曰可去矣鑑謂雖卸任猶地方官甯死勿去十二月初六日賊果蟻附城下鑑與啟埏捍禦多方義民感鑑誠從西北來援賊倏散既而偵知義民遠來無軍竈不能久越日又至義民弗能支城遂陷鑑與啟

挺死之總兵柴大紀備棺殮鎡鎡妾王抱幼子乘間先得出始間關以其喪歸其後大將軍海蘭察嘉勇公福康安率大軍平臺灣監水陸軍餉李侍堯以鎡前欠解秋冬兩季餉奏籍其家僅得穀二百斤瘠田十畝老屋一間而已鎡為人廉介慷慨任事能詩歌有璞亭遺稿據崔弼撰家傳番禺志修

居允敬字簡中南昌里人乾隆三十三年戊子舉人大挑二等選大埔縣教諭丁外艱未赴起署樂昌教諭數歲謝歸嘉慶初選福建閩清縣知縣閩清向例輸稅率折以錢錢價有貴賤官任意抵昂民以為苦允敬請於大吏平其價民大悅建祠祀焉俗素健訟服其明舊習頓革在任二十年罷官貧甚民醵金贖之歸次子棣華為鬱林州判卒於官家屬倚寓桂林無以自存廣西巡撫梁章鉅閩人也知為允敬子歎曰

廉吏之後何落拓耶為月給薪水買宅授之三子樟華又名溥最後更名鐸字少楠聰敏好學博涉經史尤精熟選理嘗作白菊詩百首才名噪一時工駢體文沈博絕麗鮮與為比文章鉅公咸賞之年四十餘始補諸生客死韶州著述散逸所存灘江草枝溪草皆少作云據楚庭耆舊傳番禺志修

何學青字道敷沙灣人父廷桂樂施子早奉母蘇以節旌學青乾隆三十五年庚寅舉人以知縣揀發湖北歷署安陸長陽房諸縣補東湖縣淫雨江漲城不沒者三板鎮帥議堵門學青力持不可率兵役露處各門不貼席者匝月修城堞撫難民計口授米捐資三千餘金而荊州以閉門罹害糜帑無數同官始服嘉慶元年正月教匪起宜都枝江宜昌鎮將遇害本鎮兵悉從征苗守備虛弱人無固志遠安賊目王

偉趙之國等勾連土賊何宗訓何示能嘯聚對馬山二月十三日學青率練勇千人於閭家坪斬王偉賊遂潰追賊至遠安之楊家垸生獲何宗訓父子擒賊千餘斬首二千餘級三月偽帥韓元孝廖扶清偽先鋒趙宗智楊宗仁等烏合三萬餘賊分五隊焚掠破山口學青復率眾禦於霧渡河賊引去追至高龍寺浹晨大霧迷失道猝與賊遇於楊家坪賊占山梁仰攻之不利乃分兵繞從山巔壓下賊大驚自相蹂躪急攻之至菁林遇伏前鋒稍挫學青令練勇解衣裹火藥擲焚之殺賊二萬人自是東湖始獲安堵功上以同知直隸州擢用旋題武昌通判大吏以士民籲留聽之七年得代去民扶老攜幼追送至荊州初兵亂歲歉民艱食學青請平糶不俟檄下卽開倉民得濟後奉駁飭增價賠累數千金旣赴武昌任大吏知其幹練遇事倚任之九年充鄉闈內監試十一年告歸越二年卒子應駒字高聘一字硯舫姿性穎異博學攻詩尤善書中乾隆五十九年甲寅舉人嘉慶六年大挑一等分發四川時三省軍務未藏勒保督川軍應駒隨營總理川東軍需局會賊黨潰散被俘者數萬人應駒請寬脅從者全活甚眾有夫婦避亂相失婦爲一將所得勒保所倚以辦賊者後婦知夫尙在潛遣人教之上訴乞復完聚勒保屬應駒斷離召夫婦至則相抱大哭應駒遂判歸原夫勒保屈意從之未幾補慶符縣調達縣十五年丁父憂歸時海賊張保郭婆帶爲亂肆劫村落應駒激勵鄉民捍禦詣縣借大礮擊壞賊舟殪郭賊之父梟奸細數人賊不敢犯又於鄉南築堡牆九百餘丈設鄉約籌公費規條完密鄉賴以安服闋選貴州

龍泉縣縣陋甚應駒修學校課諸生逾年有可觀者以母憂歸服闋揀發直隸代理交河縣兩月清積案三百餘起總督蔣攸銛詔為直隸第一能吏題補大名蔣去任調補南皮會開豫工例報捐員外郎分發戶部卒年六十七子紹曾縣丞加五品銜紹和己亥順天舉人候選知州據番禺志修

謝名鵬字今培市橋人父守應雍正十年壬子武舉名鵬乾隆三十五年庚寅副貢性至孝持已端嚴重廉恥制府那彥成訪屬內正人以為士民矜式縣舉名鵬制府旌其閭曰型方善俗名鵬待人以和而鄉里不肖者憚之人有善極力獎勸論文不尚浮靡遊其門者多所造就選永安教諭永安元峯書院向無生童膏火名鵬兼講席捐俸贍給之永俗多溺女名鵬諄諄開導其風漸息嘉慶十四年忽訛傳賊潛入城

乘邑民賽神起事知縣某倉卒閉城舉城失措名鵬親出曉諭亟合開門謠言頓息居永安三年以病歸癸酉

欽賜舉人著有周禮節錄儀禮節錄鐵水吟稿等書子天顯

郡諸生孫廷宣道光己酉舉人據謝光國撰狀采訪冊修

潘有為字毅堂其先本福建人入粵籍番禺居河南龍溪乾隆庚寅順天舉人壬辰進士官內閣中書久宦京華以校四庫書例得議敘與權貴忤卒不遷退居林下足跡罕入城市所居擅園林花竹之勝詩名藉甚有南雪巢詩從子正亨字伯臨縣貢生捐刑部員外郎負用世志嘗言於廣州知府程含章令洋船隨時載米免其船稅含章以其言白大府行之於是洋米船絡繹而至廣州遂鮮荒患正亨弱冠能文以善書名尤工詩有萬松山房詩集正亨從弟正衡字鈞石諸生

有黎齋詩草子定桂字子駿亦諸生少負異才年三十竟卒人多惜之著有三十六村草堂詩鈔

據楚庭耆舊遺詩玉壺詩話茶村詩話修

簡榮屏山人少警敏試輒前茅乾隆三十六年辛卯舉人辛丑大挑一等分發安徽歷署霍山南陵兩縣代理廣德州權池州府同知所至皆有德政任貴池時飢饉薦臻開倉平糶設法賑恤安集流亡民咸賴之後署懷遠權潁州通判補建德地瘠民貧文風未盛榮平庶獄勸農耕修學宮廣試院振文教數年間民得飽煖士登科甲訟獄衰息壬子乙卯兩充江南同考試官秩滿巡撫擬保薦而榮自以年過七十決意引退士庶遮留不得跪送塞途如失慈父母焉

據番禺志修

邱先德字滋畬其先由閩遷粵籍梅州父某幕遊羊城遂著籍番禺先德生而岐嶷有夙慧乾隆丁酉選拔中舉人丁未

成進士授刑部主事因提牢議敘補貴州督捕司主事總辦秋審陞直隸司員外郎充律例館纂修官其冬陞浙江司郎中隨侍郎德瑛平反灤陽連劫盜案釋二十三人芳園居庫銀被竊究問看守官役先德疑庫門重閉惟熟識門徑者可人看守者皆五日輪班查驗加封而已不能為也乃言於堂留禁緩結未幾滄州獲真犯案遂定五十六年出補江西撫州府知府值春雨傷稼入夏又大旱誠禱皆不為災教授王定遠撰憂早勤兩記紀其事捐俸修復興魯書院增膏火廣購書籍以造士又以文昌橋當建撫兩郡之衝久傾圮行者苦涉溺集紳民捐修五年而成郡人名曰邱公橋宜黃水災借養廉為粥以賑有兄弟爭產繫獄者反覆開導均感泣相讓其以誠化民多類此以東鄉屬案望誤降一級引

見奉

旨仍以知府用假歸省墓遂不出粵中大吏重其名延主粵秀書院講席續又主講惠州韶陽鳳山龍溪禺山諸書院年八十二卒著有學殖草堂未定稿及滋畚制義賡颺集粵秀課藝文徵等書汪鳴謙字益齋捕屬人嘉慶辛未科進士由刑部出為山西知府調太原府一日無疾暴卒鳴謙在刑部藉藉有聲論者謂其治律如治經誠非虛譽方見用而卒人

尤惜之

據滋畚行略采訪冊修

謝聖輈字德沛市橋人乾隆三十九年甲午優貢中四十二年丁酉科舉人六十年大挑一等以知縣分發河南署商邱補宜陽以廉幹慈惠稱教匪事起聖輈練勇為備賊不敢近奉檄督理南陽軍餉應期立辦尤善聽訟不事刑求惟論以

情理民各欣然散去固圉為空以母老乞歸母終服闋聖輈亦卒著有春暉堂稿宜陽補志說杜擇粹梅影軒雜誌篆法真本文選會評記事元珠惺惺篇解頤小紀宦歸紀程等書凡數十卷次子光輔字煌佐嘉慶九年甲子舉人臨高教諭幹濟有父風海賊張保為亂掠市橋光輔與從弟光國騰霄出賞募勇以守有訛言賊已登岸者光輔執而戮之人心大定乃親率丁壯飛擢出戰獲賊目賊遂遁道光元年預修廣東通志雷瓊道張育春復聘修瓊州府志所著有鷗波草堂詩草光國字利賓乾隆五十七年壬子舉人七赴公車南歸而父卒抱痛不復再試主講禺山書院及欖山書院皆以方正為及門表率尤篤友誼於欖山識周紱堂紱堂後客死廉州光國搜其投贈之什付諸梓又搜族中著作十數家刊之

題曰謝氏詩鈔截取知縣年老不就加國子監學正銜年六

十二卒

據番禺志修

謝大韜字鎮南市橋人膂力過人中乾隆四十八年癸卯武舉性篤孝計偕行抵淮陽心忽動謂同行者曰吾親嚙指召我矣竟歸再上公車不中念親老不復出嘉慶十四年洋盜內竄大韜為鄉閭守禦率草艇二十餘每艇二十餘人號礮一聲百槳齊發往來如飛賊知有備不敢近鄉里賴安大吏知其勞欲官以千總力辭以武舉終年六十九

修

據采訪冊韓懋林撰墓誌

韓懋林字清修古壩人乾隆五十四年己酉舉人前明永平通判韓上桂後也上桂殉節後所著書散逸懋林剔蠹搜殘近諏遠訪哀成先集及任海康教諭乞陳昌齊作敘刊行今

韓節愍公遺稿是也懋林早有文譽弱冠以敦慤周慎見稱世父無子懋林少從受學沒齒服勤期喪外除三載始從吉其篤摯蓋天性也性嗜書披吟無倦晚築別館嘯詠其中逍遙澹忘如在物外年七十卒著有竹香吟草子廷杰道光丙

午舉人

據林伯桐修本堂稿采訪冊修

劉彬華字藻林捕屬人幼穎悟好學乾隆乙巳舉人年甫十六同榜謝啟祚年九十四一老一小人以為美談嘉慶辛酉成進士改庶吉士散館授編修請假歸省以母老不復出先後主講端溪越華兩書院勤於課士越華向設生童正外課五十餘名彬華請於大吏增額至一百五十餘名地方利民之事輒為大吏言之六脈渠為城中水道一欠疏通遇淫雨則街衢淹浸彬華為籌畫力濬之又議設郵發局以惠貞節

此外修通志修貢院諸舉皆彬華贊成之任事不辭勞亦不與人爭交久能敬不校橫逆友愛兩弟弟歿撫從子如所生殆粹然儒者也年五十九卒遺囑不鼓樂不作佛事家祭毋殺生出殯人夫毋得過百人毋刻行狀毋撰墓誌毋刻詩文集卒之日識與不識莫不歎惜之選粵人詩名嶺南羣雅集

據聽松廬文鈔嶺南詩鈔修

韓日進字善科少穎悟讀書至再輒能默誦為文頃刻千言乾隆丁酉舉人大挑二等以教職用補瓊州府定安縣訓導定安僻陋惰於習文日進至勤月課親為指畫與諸生相處如家人探花張岳崧其所舉優行生也在任十六年遇貧士注冊等規一毫不取年七十卒於官定安人稱其留心造士樂易可親見之者如飲醇醪於其卒深惜之

據定安縣志番禺志修

陳廷選字允充大嶺人父星海工詩善鼓琴廷選生而穎異年十二賦梅蕾詩有名乾隆甲寅舉人禮部試報罷考取教習不就歸大挑亦不赴以親老未敢遠離也與人交久而彌篤排難解紛不遺餘力總督邵彥成以型方善俗扁其門焉道光十一年選鄆縣知縣下車旬日周覽土風歎曰此地俗厚民淳吾惟案無留牘使民稱便足矣自奉甚約按期課士躬親檢閱下鄉勘驗不許科於民邑書院有膏火田數十畝劣生盤踞構訟多年廉得其情勒令償還延師訓士復捐俸以佐之十四年淫雨壞橋大吏檄采栢樹千株奸民藉勢盜取各祠廟墳塋古栢邑民紛紛投狀廷選力請報免民有嫌婿貧悔婚者為判合以鼓吹送歸土棍包攬稅契摹縣印以欺愚民審實幕友恐望誤廷選曰吾甯舍此官斷不令此徒

倖脫卒置之法莅任五載頌聲載道十五年調補榆林以疾辭卒於西安年七十所著有百尺樓吟草吟草續集百尺樓

文集若干卷

據番禺志修

凌旭升字昶東金鼎人乾隆乙卯舉人嘉慶辛酉進士以知縣分發山東任安邱縣陋規悉除之值大旱親行烈日中禱雨雨立沛邑人感頌焉素擅醫術民有疾病行縣見之親為診治施以方藥由是邑鮮癘疫縣中婦穉皆呼為凌阿婆邑紳某故舊也縣考人意必拔其子案發則首選者一寒畯力學之士時安邱旱澇相繼旭升請賑旋以憫荒緩征竈課未完望吏議落職士民籲巡撫借留得

旨需次調補既而丁艱歸囊無所有縣民共資助之晚年主禹山講席召其族年六十以上無告者給冊往米肆取米終

歲以脩脯償其值建彬社書院為二十四鄉誦習所月課外舉行鄉飲酒禮以教齒讓歲暮聚子弟令背誦經書而獎賚之方彬社書院落成鄉人徧延鄰廟神像列堂上旭升令撤出乃行禮兩廣總督鄧廷楨進士同年也旭升非公不謁其持正多類此卒後家徒壁立制府高其義倡僚紳醵金恤其遺孤二十四鄉祀其木主於彬社云旭升族人壤字容之年十四補弟子員乾隆丁酉舉人署山西靜樂縣以廉能稱縣有豪民壤召而訓戒之豪愧服改行五家庄有田十餘頃為汾水冲沒民困虛徵者百餘年壤力請豁得允歲飢捐廉倡賑樓煩鎮去治遠胥吏藉賑中飽壤單騎往察之民得實惠在任四年卒於官宦橐蕭然士民助之始歸其柩壤兄培字宅中乾隆己亥舉人選江蘇泰興縣知縣泰興故美缺培僅

一年自以催科政拙請改教職得茂名教諭任滿復引退殆

恬淡士也

據番禺志修

蘇鴻字鉉彥古鑑鄉人乾隆乙卯舉人歷任信宜長甯開建
教諭補連州學正所至課諸生如子弟晚年辭官主講禺山
書院復課後進如諸生四歲失母事繼母江侍病嘗藥朝夕
不離善吟詠工畫繪喜絲竹愛山水尤有石癖為人廉介貧
不苟取著有侶石山房詩草年八十三卒

據松心文鈔柳堂師友小傳采訪冊修

區德培字賢世烏洲人兄弟五人德培最長母李嫡也弟庶
母何出何本李媵李歿德培事何如所生友愛諸弟諸弟亦
忘為異母焉里居授徒貧者却其贄其論學以變化氣質為
先以信古篤行為要鄉人與鄰鄉訟縣官稔德培誠樸獨召

問之德培但引咎求飭和息官如其言訟得解嘉慶十三年

戊辰年七十

賜副榜十五年庚午

賜舉人卒年八十有四從弟賢書少聰穎能文與德培皆有
聲譽序南海馮成修欽州馮敏昌諸名宿喜其學行曰為畏
友宮保尙安巡撫粵東試觀風會考者數千人拔賢書第一
延居署中使公子受業賓主相得甚歡賢書課讀外絕口不
談公事尙安益重其品年五十四中乾隆壬子舉人嘉慶辛
酉大挑二等署永安訓導補鶴山訓導所至振興文教每月
課士必作程文以為諸生式卒年八十有一

據番禺志修

李則權字節之獵德人父承業善文辭工篆楷不求仕進年
六十餘為海賊擄去則權狂奔兄所謀所以脫者兄曰勿憂

父已老賊無所用挾以索財耳舍之將縱歸則權曰不然父性倔强守義必抗賊即不被害亦見凌虐安有父蒙難而子安坐者必贖父兄猶不可則權日夜號哭不食有鄉人某自言與賊黨有舊得金即可贖則權信之授以金促之去逾月音信杳然兄怒曰無知年少輕忽作事為奸人所賺矣則權曰銀失何惜惟望父還請析父產與弟當盡以求父不以累兄也兄不得已析與數百金懷之去偽作小販蹤跡賊所賄賊黨引謁其渠乞見父賊渠執火指所列礮曰我熱礮爾敢當吾礮即還爾父則權跪以頭抵礮口哭弗止賊念其誠謂曰實相告爾父於月前病故矣則權聞之一慟幾絕賊扶之起示以屍處時賊艘泊獅子洋遂藁葬父於蓮花山之陽初賊知則權父有文翰欲得為書記權父不從不食死後官軍

平賊獲其渠并俘其黨百餘人戮於市則權賂劊子取賊心肝歸祭父則權家貧食力事母甘旨不絕鄉黨稱孝無間言後以勤儉起家能急人之急年八十六以無疾卒子恆昌郡庠生孫蘭邑廩貢生元臣及曾孫大觀俱武生有孫九人

周志修

徐本義字申之原籍浙江仁和人父游粵生三子本義其仲也兄本仁弟本禮俱補邑商籍生員時有三徐之目本禮年十二為文驚耆宿未冠卒本義哭之慟既痛弟歿事兄益恭本仁後中鄉榜本義薦弗售學士平恕故人也為廣東學政本義聞之曰故人為學使吾尚逐隊考棚乎自此不赴試齋商某延之課子一日綵觴宴客本義居首坐會有達官至主人請讓坐本義曰貴可加於師乎吾可避席師道不可貶也

即起辭去性狷介非其義一介不取又不治生家益貧嘗有
戚友除夕前往訪之聞吟誦聲徹戶外入門老屋蕭然綠苔
上砌几硯間梅花一瓶史記一卷方讀伯夷傳也詢其家人
則囊罄已數日矣為古文學歐會詩宗唐人晚年間學宋人
書法瘦硬得顏魯公爭坐位帖意弟子從遊者半掇科第去
而本義竟以諸生終無子詩文皆散佚

據聽松廬文鈔
嶺南羣雅集修

呂堅字介卿歲貢生性兀岸自異少所許可高談雄辯四座
皆驚家貧甚然胸次磊落無所介簞瓢屢空笑傲自若也以
同邑張大進為師大進博極羣書文筆奧瞻堅盡受其學益
都李文藻見其詩奇之由是得名與順德張錦芳黃丹書黎
簡稱嶺南四家詩文幽豔陸離奇情鬱勃不肯作一常語顧
曾登召場老而不遇於四家最後歿云著有遲刪集若干卷

據嶺南四家小傳嶺南
羣雅集嶺海詩鈔修

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十終

廣州府志卷一百三十一

列傳二十

國朝 番禺

金菁莪

弟菁蘭 菁茅

漆璘

倪世華

陳大經

林伯桐

劉華東

陳曇

邱毓璋

許秋

崔弼

吳應昌

黎光弼

周日新

蔡蕙清

弟蓮清

陳仲良

張杓

鄭灝若 陶克昌

凌揚藻

父驥

黃喬松

鄭芬

張維屏

父炳文

子祥晉

李士楨

梁信芳

黎大經

何振剛

謝朝陞

吳振亮

黃遇龍

李仲瑜

朱炳

陳熊

徐序經

金菁華

何烈

劉需

區昌豪

洪應晃

段佩蘭

梁同新

陳其錕

馮詢

許祥光

父賡颺

弟禮光

潘仕成

劉殿相

梁國熾

陸殿邦

崔自紹

何若瑤

父森

黃子高

儀克中

黃玉階

虞必芳

沈世良

許

楊榮緒

侯康

侯度

孟鴻光

陳泰初

柳承祖

沈懷禮

沈史雲

何壯猷

陳良驥

屈超羣

黎安瀾

嚴政朝

姚麟

崔連陞

蘇海

王振高

子榮德

蕭裔靈

袁灝

子錄

金菁莪字藝圃捕屬人乾隆六十年乙卯舉於鄉嘉慶七年壬戌成進士即用知縣報捐主事籤分兵部家世鹽筴然自奉甚儉謂今人事事求美曾不量入為出此自貽伊戚也惟飲酒不儉飲必佳醞酒後頗有灌嬰罵座之風而性耿直獎

善規過語皆由衷非近世面諛比也丁憂歸服闋入都遂卒年四十四弟菁蘭字春汀嘉慶五年庚申舉於鄉戊辰大挑一等分發直隸以道遠不能迎養遂乞假歸卒年三十八弟菁茅字子慎號醴香年十九補弟子員嘉慶十三年戊辰舉人兩赴禮闈旋丁外內艱遂無復科名志家本鹽筴食指既眾不能不以身肩其任粵餉百萬責成總商數人菁茅與同事協力籌辦每屆奏銷皆有盈無絀道光癸巳廣肇大水大府設局捐賑菁茅在局忽聞

欽使至人為之危然其事卒得白辛丑冬洋人欲入內河靖逆將軍奕山命菁茅守獵德轍臺菁茅即在轍臺度歲洋人間有備不復至己酉洋人復申入城之議菁茅偕同人團練致書英酋議得寢先是已就職內閣中書以辦賑加同知銜

賞藍翎以守臺勞保舉員外郎換花翎至是又保舉郎中而

是時羣盜如毛菁茅所辦連陽埠自州城破後劫去餉銀十

數萬加以丙辰一炬屋宅並遭焚燬遷居佛山得病未幾遂

卒年七十三菁茅兄弟怡怡敬事寡嫂待諸姪如子親戚待

以舉火者數十家其死也人咸惜之著有遺經樓詩集五貢

考子銘吉道光己酉舉人

據詩人微畧張維屏撰行狀修

漆璘字仲琛其先漆世忠自江西南昌來粵占籍番禺璘有至性年十二侍其祖於南甯書院左右服勞不假僮僕中嘉慶三年戊午舉人再試禮部不第將歸座師留之對曰親老多病義不可留竟歸歸數月父卒後八年會試又不第歸道出湖南當事者耳其名執羔雁羅致幕中母在不可既歸母病奉湯藥視含殮凡送二人終皆由七千里馳歸既免喪猶

哀慕不已祭日必泣語兒輩曰為人子孫若精神時時與祖宗相接則不善之念無由萌其厚自刻厲如此有同年生與計偕道病璘躬為調護及歿料理其喪歸東莞某令聘璘閱縣試文有屏人來謁者以三千金求冠其曹璘怒擲其刺曰若汗我拂衣去晚年絕意進取讀書自娛著有三禮舉義四卷春秋舉義三卷鐵鳳齋文集五卷思古堂詩四卷劍光集二卷損齋筆記二卷卒年六十四子啟昆啟祥俱生員據蔣敦復

撰傳

倪世華初名孟華字素之原籍上虞遷粵東補人番禺庠方少壯銳志科名兩從父皆業鹽筴家素封勸之商嗒務世華意不屑也既而屢試不售赴北闈仍不售從父遺書勸歸世華以必得科名始歸從父乃寄以資世華見急輒助遂致匱

乏顧性倔彊恥借貸落落難合初猶授徒繼則寄食僧舍僧見其孤窮語侵之不得已遷破廟中嘉慶五年庚申乃中順天鄉試舉人六年成進士授內閣中書以謄錄議敘補刑部主事擢員外郎落落如故既而丁內艱歸服闋入都補御史未幾卒年八十三世華性剛嫉惡不畏彊禦人咸惜其不早

為言官云據聽松廬文鈔采訪冊修

陳大經字子常父龍駒以老明經授徒里中大經幼從父讀年十八補諸生嘉慶五年庚申舉人三試禮部歸家益貧母老授徒以養教人以立品為先有延之課子者禮稍簡漫輒却其聘鄉黨有不韙之事必挺然爭辨以故落落難合寓都門時裘敝金盡而知交顯宦不投半刺其介如此事母孝友愛諸弟教訓婚娶以至成立病危以聯語自輓曰萬種未完

為子事百年空負讀書心遂卒年三十有四無子弟為立繼

聞者皆歎惜之

據香浦文稿陳曇撰行狀采訪冊修

林伯桐字桐君捕屬人嘉慶六年辛酉舉人自少力學砥行丙子試禮部歸父已卒悲慟幾不欲生居喪悉執古禮蔬食三年不入內自是一意奉母不復與計偕讀書課徒不涉外事所交遊皆當世知名士學殖淵博同時學者有遺忘往叩之無不元元本本儀徵阮元督粵建學海堂以造士耳其名首延為學長總督鄧廷楨亦聘之訓子詢以外事則引嫌不對總督益重之友有嗜奕者伯桐竭力勸之友為罷奕及門有過不加顯責惟微使之知人自愧改里黨間無論識與不識有不善咸恐伯桐聞也所居整潔置器少不如禮亟命更之閨門雍肅僕從不得過中庭其踐履以宋儒為法而研經

特宗漢學嘗謂不考信六藝不通知古今何以為儒故十三

經注疏皆手自丹鉛又以朱子不廢古訓作說證之其實事

求是泯門戶之見類如此用辰謁選授德慶州學正之官數

月卒年七十學者稱月亭先生著有毛詩通考毛詩識小史

記蠡測供冀小言古諺箋公車聞見錄學海堂志民人士人

職官冠昏喪祭儀考修本堂詩文稿伯桐沒後邑人議舉入祀

鄉賢格於部議不果嗣子世懋邑生員

據黃培芳撰墓志黃位清月亭遺事張維

屏撰墓表修

劉華東字子旭原籍福建父榮海入粵筦鹽筴遂占籍番禺

華東自少負才仗氣遇事敢言為文縱橫奇譎不受繩削世

以文怪目之中嘉慶六年辛酉舉人新會富商黃緣當路以

其父從祀郡學鄉賢其父嘗與從兄爭拔從兄髮新會有案

入祀日於明倫堂大會賓客唱戲張飲郡人士非之而無如
何華東試禮部歸審知顛末上書制府陳不可制府以公事
不當私謁還其書令具牒華東述於同里陳曇曇久有是意
以華東好大言謂爲誑華東遂以書付梓曰草茅坐論一時
遠近稱誦於是闔郡紳士爭來見華東不期而會者二百餘
人華東乃爲祭文偕詣郡學鄉賢祠謁陳白沙粟主讀而焚
之伏地大哭聲振於費退而錄拔髮案聯名呈大府巡撫護
前欲寢其事道府以下先後承審官皆迎意多方詰難忱以
利害華東不爲動富商遣人啖華東重金亦不動

朝廷命大學士章煦侍郎熙某案問章相藩司姻親也意存
左袒既黜商父祀仍撫草茅坐論語華東坐革去舉人是舉
也自始事迄訟平凡十月華東羈守南海署者五月對簿公

庭者十數次艱險備嘗旁觀股栗無沮色無愞詞卒使祀典
章明庠序無玷扶持名教人咸偉其功然自是以後抑鬱無
聊頽然自放年六十四遂卒陳曇字仲卿充府學生員天資
穎異襁褓中能屬對年十三已讀十三經稍長通史學尤熟
兩漢南北史其對簿鄉賢案也時制府方巡邊會審於藩署
大堂中設

皇帝萬歲牌承審官左右分四座上爲兩

欽使次則巡撫及藩司吏役排班贊堂眾官肅立紳商皆青
衣候質時章相意在嚴懲首摘草茅坐論中朝中有人上下
其手句爲問謂當今

朝政清明何人敢爲鬼蜮欲以謗毀罪之也華東對稍遲曇
進曰某輩草茅豈識

朝儀所識者撫院之私朝耳章曰人何指曇曰人則眾論皆指方伯則正章之姻也遂撤堂後屢訊曇皆侃侃無所屈章怒曰爾既識法爾頭上所戴何頂曇曰公謂何頂章曰金也曇曰生貧不特無金亦無銀此銅頂耳章語塞案結巡撫藩司亦被議是時曇與劉華東如驂之靳公庭對簿華東多得其助焉曇時年甚少汀洲伊秉綬見其詩奇之後南城曾煥藩粵亦器重曇贈詩以小鳳凰為喻生平慕鄺湛若之為人顏其齋曰鄺齋晚以貢生候補訓導署揭陽教諭年六十八卒於家著有海騷十四卷感遇堂駢體文四卷鄺齋隨筆四

卷

據張杓撰三山墓誌松心文鈔嶺南羣雅采訪冊修

謹案黜鄉賢一案首事者香山黃培芳東莞鄧瀆與曇皆以諸生肄業越華書院是時城中日有揭帖三

人議每日分途往錄錄成一卷於制府課日交收卷委員委員不可掌教為海康陳昌齊勸之收曰此公論欲制府知之耳 朝議已準詎有翻覆委官以呈制府三人謂已通於上可以舉發而生員不合呈首於是華東始入焉富商者盧文錦入鄉賢者其父觀恆也當呈邑學時新會眾紳皆簽名而主其事者為進士譚大經華東移書責之譚答書認罪曇知其兄之辯存新會房以三百金買其案事起盧氏欲賄滅之而吏抱案先逃不可滅於是集郡學簽名來者日眾惟新會進士張衍基方授徒省城不肯署南海舉人龔在德令人往罵其徒其徒遂開堂請退衍基不得已列名則會邑有紳矣華東乃以揭帖並草茅坐

論寄其師孫御史御史以聞又遣老生殷某往江西越控而其時已特發欽差制府蔣攸銛方因案不與事巡撫則董教增藩司則趙慎畛也番禺志官商皆隱其名固為尊者諱但此案為郡中第一大案事亦為名教第一大事不著名無以徵信且董趙皆名臣國朝先正事畧有傳不能以一胥掩而此胥亦不可掩也故詳著於此俾後有考焉

邱毓章號雲衢嘉慶六年辛酉舉人大挑二等選大埔縣教諭有劣生犯姦被控饋千金求緩其事毓章嚴拒之詳革生衣頂其後生賄息訟事復饋金求開復又嚴拒之其持正多類此以不獲迎養老母引疾歸道光十五年吏部截取知縣毓章辭改大理寺評事銜先是藩司常祿聞毓章名延課其

子時粵中當店減利期不一致無賴持械勒減甚或釀巨案

毓章言於藩伯以十月朔至除夕為期申大府奏請立案自

是窮民得早減利而無賴不敢逞云卒年六十有九著有學

詩草茶陽草閒居草

據詩人徵畧番禺志修

許秋字藝圃潭山人嘉慶六年辛酉舉人為入慈善長者先

嘗解衣掩餓殍及入棘闈鬚一人衣所解衣來謝是科遂

獲雋計偕北上道中墮車為輪所轆竟無恙道光元年

詔舉孝廉方正越華主講劉彬華意在得人以勵俗言於當

道舉秋以應時南海亦有所舉闔邑不慊榜於衢言必如番

禺所舉為不忝其並為鄰邑見推如此秋性渾厚犯而不校

人以為仁柔然嘗率岡尾社紳士赴縣攻訐匪類令諱盜置

不理反懸牌申飭有一犬吠形百犬吠聲之語乃謁大府請

質審令復詰秋曰爾計盜聞之乎抑目擊之乎秋曰目擊之
曰奚而目擊秋曰舉人主講獨洲書院泛舟回家道中親見
盜也縣乃語塞是舉微秋已縱盜矣年八十餘卒據粵小記
番禺縣志

崔弼字積匡員岡人父國佐邑生員以孝聞於鄉弼少承家
學年十二能詩未弱冠成詩一卷名邛今集既壯才氣縱橫
時賢傾倒中嘉慶六年辛酉科舉人南城曾煥為廣東布政
使愛才下士每枉駕造其廬弼家貧煥時賙以粟帛至再三
不得辭乃受故煥贈詩有云燕寢清香一樽酒眼中復得謝
與崔謝謂南海庶常謝蘭生也又云崔子商歌出金石豪氣
不為饑寒銷弼序懷詩亦云雉介雞廉分所宜蠅營狗苟欲
奚為其介然自守可知矣平日遊公卿間未嘗干以私詢以

公事輒不對其子連陞從軍連州人辭弼以捐軀報國語訓
之刺刺不休家人厭其不祥思掩其口不得也連陞卒能戰
死事具連陞傳弼日事纂述自親鉛槧卒時年八十九總督
阮元題其墓曰詩人崔鼎來寶藏著有珍帚編詩遊甯草兩
粵水經注波羅外紀等書據玉壺山房詩話嶺
海詩鈔番禺志修

吳應昌字其升孟且孫也弱冠而孤教讀養母嘉慶六年辛
酉舉人試禮部歸鍵戶授徒從遊者多得甲乙科以仕而應
昌無宦情併詩文不求人知惟教子甚至丙子二子家樹家
懋同舉於鄉隨父入都人以為榮是年大挑應昌以一等分
發江西試用知縣甫至思親告歸遂不復出性和易善談笑
與眾處望之無涯涘而於俗尚一無所染也次子家懋成進
士入翰林外補直隸高邑大成縣應昌母猶健在戚友勸應

昌就養官舍應昌一意侍親樸勤無改人稱其能守祖訓年

六十六卒遺令薄葬平生教家錄之成帙云

據修本堂稿修

黎光弼字從輝市橋人少貧隨父賈於市既冠始讀書温燁經史為文取徑獨別制義亦崛奧時文中樊宗師也生平規行矩步心古視端孝友天至父嗜酒喜冷飲光弼懼其性寒蓄鹿茸釀醇醪以進之母病目將盲光弼日日晨興灑手漱口跪母前舐母目得不替待諸弟怡怡父貨皆以讓弟又倡族黨建存萼祠以祀本支之無後者嘉慶元年春大興朱珪撫粵課士越華書院見光弼文大賞之手授十三經注時同邑李士楨亦以文見譽因與光弼定交尤相契嘉慶六年辛酉科光弼中鄉舉試春官不第將歸而士楨適以拔貢入都相與登薊邱眺桑乾河水指點黃金臺慷慨傷懷扼手而別

歸數年遂卒士楨別有傳

據青梅集番禺志修

周日新字輝谷南岡鄉人母殷以節得

旌日新中嘉慶二十一年丙子科舉人道光二年壬午成進士官臨湘縣知縣甫到任遣人迎母母以道遠不赴日新慨然曰吾母以青年苦節撫予成立予可以升斗祿遠離吾母乎即辭官歸授徒養母數十年如一日

據嶺海詩鈔番禺志修

蔡蕙清字元善蔡邊鄉人嘉慶十二年丁卯舉人報捐光祿寺署正供職京師慷慨急人之急粵人南還乏資斧者蕙清無不代為籌畫或出已有贈之大石何天祥瀝滄衛品純病歿在都蕙清並為之殯殮歸其柩丁父艱歸諸弟求析產產故薄析之無幾蕙清推已所得益之晚積資至刑部主事咸豐元年告歸主講惠州豐湖書院四年廣州紅賊之亂土匪

四起時蕙清家居鄉人獨奉約束無從亂者是年卒年六十八著有抱甕齋詩若干卷蕙清爲人通爽豪於酒客至輒留飲飲可盡一斗遇朋儕宴集高談雄辯雜以諧謔輒傾其座云弟蓮清字獻善邑附生性至孝奉母得其歡常自言母百年後亦必隨母去及母卒蓮清已病哀慟逾日亦卒

據番禺志修

陳仲良字希亮大嶺人幼聰慧日誦二千餘言九歲畢十三經家有藏書積萬卷日夜披閱經史而外凡天文地理王禽奇乙以及風角術數莫不通曉嘉慶十三年戊辰舉人道光六年大挑一等籤發四川以知縣用歷署蒲江安岳清神等縣壬辰鄉試充同考官補授鹽亭調署三臺復充丁酉鄉試同考官卽補成都十九年陞合州知州引

見陞綿州直隸州知州十月擢河南南陽府知府仲良在川

十有七年每至一邑必訪其利害而興除之尤嚴於訟師棍徒窩家教匪每微行訪察得其名隱記之不動聲色以次捕獲嘗輯齊民律纂八卷以曉愚民重刻呂新吾四禮翼一書以訓士類編西蜀二十四孝繪爲圖繫以詩歌以教童蒙其條教號令亦刊爲小本期於家喻戶曉案無輕重隨讞隨結事關骨肉以至誠動之每感泣終日兀坐堂皇署內人出入必目覩之官衙陋規爲之一洗任鹽亭最久邑皆山無十里平一遇歲歉薯芋不充仲良相其土宜地勢考古今水利成法作爲圖式二十餘事勸民種植不三年恆歲之入增三之一又諭富民蓄游惰之民使爲種植其殘廢老弱者則廣養濟院額以收之葺險要察奸宄敬禮紳耆表揚節義始至鹽亭獄中人情實二十餘人繫外獄者五六十人及其去僅十

餘人耳川俗盜特盛前令威以刑人斃而盜不止仲良以仁惠平恕爲治乃十七年任州縣者八無劫奪之案云嘗輯西北水利一書守南陽時喜地勢平衍溝洫可行布政使張某亦許爲籌款旣而中牟堤決勢不暇及仲良旋卒於任事不得成論者至今惜之又於川省條議弭盜十四款鹽務八款查辦鴉片八款勦猺夷六策糧務章程十款皆通達治體所著有儀禮約旨節訓策纂補正周禮纂註儀禮經傳通解集成周易道器通經籍類求經義釋疑論史隨錄古文存稿西北溝洫水利輯說沿海邊防輯說等書子泰初翰林院編修平樂府知府泰遂咸豐辛酉科舉人泰初別有傳據番禺志修張杓字慶璿先世浙江紹興人父遊幕廣州遂爲番禺人杓少聰悟雙目炯炯坐黑室中露其光如兩炬射人讀書過目

成誦不忘人稱神童弱冠能爲古今詩駢儷之文中嘉慶十三年戊辰科舉人初以挑得揭陽教諭後以例改國子監學錄皆未任四十歲後折節治經學工隸書說文隸釋隸續金石文字之書考證十三經注疏之說蠅頭小字錄於簡端晝夜不輟手道光二年儀徵阮元督兩廣開學海堂課士以杓首選後復延入署課其子杓日督課夜點勘羣書恆達旦不寐目力過竭嘗乃大作遂辭歸明年主南雄道南書院講席勤課如故雙目瞽焉生平孝於事親父病刲肱以療之遂瘳妻父鄧天麟愛杓才不以其貧而妻之女子歸五十日而歿杓感其意三十年不復娶爲人剛直負氣能與朋友同禍患新會富商祀鄉賢案嘗與劉華東諸人同對簿訟庭不爲勢屈道光二十一年洋氛起上書於參贊大臣楊芳者六於巡

撫祁墳者二條陳戰守之策又皆鑿然可行也年七十一卒
 所著遺書文集皆散佚南海桂文燦為采訪輯之編為儀禮
 古今文考一卷經史筆記二卷增考尸子三卷四民月令一
 卷張學錄集一卷拔貢鄭灝若字萱坪生員陶克昌字綏之
 俱捕屬人灝若有吟秋草克昌之稿於道光十三年大水失
 去皆嗜古之士也

據會到撰家傳鄭獻甫撰墓誌
 桂文燦撰張學錄遺書序修

凌揚藻字譽釗譚村人郡增生父驥喜酒嗜古酒病弗能履
 遂舍舉業杜門養疴相過從者多田夫野老及憔悴專一之
 士或終日寂對不一語著有懋鳴草揚藻幼具異稟能日誦
 數百言大興朱珪撫粵愛才下士揚藻與何大源何應駒等
 均被温接姚文田督學見所試禘祫異同考擬趙充國頌擢
 置一等嘉慶十四年秋海寇迫內河市井亡賴乘間劫掠揚

藻為畫方畧有警則縱金發礮近者赴救遠者搃要害為聲
 援由是盜不敢犯其論學以躬行為本以毋自欺為端以期
 於有用為歸宿所著有藥洲詩畧六卷藥洲文畧十六卷續
 編十二卷拄楣絕記六卷四書記疑錄六卷春秋咫聞鈔十
 二卷蠡勺編四十卷嶺海詩鈔二十四卷年八十六卒子湘
 衡亦縣增生有論癡子集湘芸有百尺梧桐書屋草張維屏
 稱其祖孫父子兄弟人皆有詩詩皆有集粵東百年來未多
 覩也

據吳應達撰墓誌劉達成撰懋鳴
 生傳藥洲事畧聽松廬文鈔修

黃喬松字蒼厓邑貢生侯選雲南鹽課提舉司提舉少以家
 累溷跡鹽筴暇仍手一編究心經世之學嘉慶己巳海寇起
 撰平海策當道延之襄事密陳方畧悉中機要家無擔石而
 座客常滿詩人如鄭棻陳晁輩恆主其家唱和又喜與寒士

鐫詩稿為詩文援筆立就制藝尤工顧屢躋於鄉闈學使翁心存相馬篇殆為喬松暨鐵嶺樊封作也著有鯨碧樓詩鈔鄭棻字子幹縣生員負異資詩章瑰麗早喪耦南海招子庸愛其才以女妻之顧家貧甚連不得志於有司落魄以歿年僅三十四著有海天樓詩鈔據嶺南羣雅嶺南耆舊集修

張維屏號南山捕屬人父炳文字虎臣生百日而孤母黃苦節事具列女傳炳文事節母以孝聞初補商籍生員改歸番禺嘉慶六年辛酉舉人戀母不赴禮部試母年八十五卒丁丑始赴都大挑二等補四會訓導喜吟詩抒寫性情不事雕琢著有玉燕堂詩鈔二卷卒年七十有四維屏幼能詩嘉慶九年甲子舉人至都學士翁方綱譽之由是詩名大起在家與同邑林伯桐黃喬松段佩蘭香山黃培芳南海孔繼勳築

室白雲山曰雲泉山館據蒲澗濂泉之勝汀洲伊秉綬題曰七子詩壇道光二年壬午成進士以知縣分發湖北署黃梅縣時江水隕隄災民遍野維屏以帑金賑濟區畫條法民得實惠補長陽縣署松滋廣濟縣襄陽府同知乃遊習家池徧種桃柳爛如圖畫丁父憂服闋捐陞同知分發江西署袁州府同知泰和縣知縣吉安府通判南康府知府年五十七假歸不復出其在湖北以不欲收漕告病上官異之曰未聞知縣不願收漕者也既歸遊鼎湖山七星巖西至桂林遊諸巖洞返賃居花埭之東園子祥泰於花埭西築聽松園為父著書地榜其堂曰松心草堂遂頽然不與世事以詩酒自娛維屏善書乞者踵至朝鮮小呂宋咸來求之為學海堂學長堂中士虞必芳少年善屬文維屏往拜之曰昔吳學士稟老矣

聞人誦吾詩輒來拜我我敢不畏後生耶其愛才如此通醫學不治家人生產總督林則徐同年生也始至廣東禁鴉片煙訪於維屏維屏曰毋開邊釁咸豐九年以疾卒年八十所著松心詩集外復有讀經求異經字異同史鏡

國朝詩人徵畧藝談錄松心文集等書子祥泰道光己酉舉人湖北漢川知縣祥鑑己亥舉人祥晉丁酉舉人以捐輸議敘員外郎分工部選刑部轉江南道御史咸豐元年河決豐北祥晉奏請江蘇漕糧由海運以所省運費濟河工而截留漕米三十萬石賑豐北災民報

可授刑科給事中廣西賊北走陷金陵祥晉奏言廣西用兵以來咸曰無將才臣以爲將才惟勇與謀今日之急以勇爲先督撫養尊處優距賊數百里凡所調遣下一札行一牌其事遂畢惟靜坐以待稟報粉飾以作奏章此豈能滅賊者今軍營諸將最勇者向榮乞

皇上取畏葸諸將置重典而命向榮爲統帥並令保舉勇將則士卒踴躍用命矣奏入

上命向榮爲

欽差大臣賊至河南京師未設備祥晉與同官條奏京城外宜立營城內宜編保甲京城及通州各倉有在城外者宜先支放或運米入城揚州金陵宜選將分兵馳衛京師奏入

上命設巡防處賊至直隸祥晉奏言賊距京五六百里若待直隸總督及軍營摺報恐誤事機請飭州縣探賊在三百里內者兩日一報二百里內者一日一報一百里內者一日兩報先頒格式使州縣填寫由順天府以聞

上從之當是時京師防衛嚴密偵報迅速祥晉有力焉授廣西左江道以出京遲緩革職是時逆賊李開方據高唐州之馮家屯科爾沁郡王僧格林沁以重兵攻之不克祥晉詣軍營言曰此距徒駭河一百二十里穿渠灌之可滅也王問祥晉汝能穿渠乎曰能問幾日渠成曰十日王曰十日賊覺遁矣限五日祥晉諾而出王下令限三日祥晉大駭急集夫役執令箭馳馬大呼晝夜不絕聲三日渠成水大至賊不得出遂乞降王奏復祥晉官發江蘇候補會洋寇陷廣東省城祥晉求上官爲催餉委員由上海附輪船四日至見父母於城西之泌澗乃潛謁督撫謀復城方盛暑感疾卒年四十二子兆甲咸豐乙卯舉人改名清華同治乙丑進士現官編修兆鼎舉人

據息耕堂文集修本堂稿嶺南羣雅集陳澧撰墓誌番禺志修

李士楨字廣成市橋人世所稱李東田者也少負異才與順德黎簡遊擅詩尤工駢體文吳慈鶴以力掃門面獨闢蠶叢詡之家貧橐筆四方惠潮嘉道胡克家延之幕府嘉慶元年巡撫朱珪督兩廣士楨爲克家作賀賤制府異之後知爲士楨筆特召入節署賜食因命擬元年

恩詔謝表又親題士楨所著青梅巢詩稿士楨由是益知名時尙未應童子試制府令赴縣考士楨引嫌試一場卽返潮州制府馳書克家曰李生實可培之器今府試在卽恐復以貧瞻顧閣下其量資之俾速來克家遂飲五十金遣士楨歸府試以第一名送院遂補諸生六年充辛酉科拔貢入都未遇歸讀書粵秀山龍王祠作山中讀書賦感朱公之知作受知始末又作朱文正序畧自謂三十年來開笑口之日無幾

廣州府志 卷一百三十一
得閒則含毫伸紙蹋壁高哦殆名士之失職者也著有青梅
巢詩鈔青梅巢外集若干卷子潢亦生員據嶺南羣雅青梅巢詩鈔自序及外

集采訪冊修

梁信芳字薊甫捕屬人嘉慶十三年戊辰舉人截取知縣道光癸巳本省辦賑出力加六品銜生平秉性方正持躬端謹他無所好惟於學孜孜不倦五上公車不復出家居課子姪嚴而有法雖逾壯年訓飭之不少假晚厭時事杜門謝客究心經史暇則吟咏自怡著喪禮酌宜家訓摘要等書又有桐花館螺涌竹窗北遊諸詩集子九人國瑚道光辛丑翰林國琮道光戊戌翰林皆官編修國璜國璣皆舉人國瓚廩貢姪國珍庚子進士內閣中書據番禺志修
黎大經後改名德懋字益泉捕屬人充撫標左營馬戰兵嘉

慶元年三月湖南苗匪不靖大將軍福康安檄廣東兵赴勦大經請於總兵李錫命願為前隊錫命壯之即拔為前鋒十二月初五日戰於湖南之右隆寨破之獲賊首石柳鄧并其子等數十人餘賊殲焉領侍衛內大臣勒禮善嘉之拔行營外委二年從征湖北教匪九月抵茄坪以鎗斃賊首林之華賊大潰三年正月戰於中寶寨殺賊千餘軍中由是知名十七日譚家耀賊全股掃蕩大帥德楞泰以功上奉旨賞花翎擢守備遂從德楞泰追賊入陝四年入川搗羅其清賊巢焚之獲其弟羅老五其清走死五年進攻城頭堰擒賊首冷添福復擊滅張漢潮張正潮各賊十一月轉戰於蒼溪縣雲台山賊大至總兵李錫命沒於陣大經中流矢楊芳兵援之乃免五年復入陝戰於二郎壩六年復經黑小河及

鎮安縣小河口手把岩瓦房店關門寺三家壩杜家壩大啞口大小數十餘戰皆不避矢石或獨騎偵探悉得賊情軍用屢捷經畧大臣額克登布嘉之用為總理營務處九年川楚平旋師回粵署撫標左營守備緣事革職既而巨盜張保橫恣海上巡撫百齡委大經監造戰艦與張保戰於零丁洋磨刀洋燈籠洲等處張保等受挫就撫撫軍乃奏復大經前山營千總旋調廣甯城守大經久歷戎行老於兵事至廣甯見地廣兵少請於總督增兵六十名并一員晝夜巡緝三月一更益以廣甯與廣西懷集接壤山路岐雜不可無以扼之也總督立允其請時三水縣西南墟盜賊肆劫紳民請添設文武兵役大府委大經為西南汛撥前山兵九十名駐防大經議於南三交界之三江墟設卡記委一兵三十於青塘設卡

外委一兵三十於白泥設卡記委一兵二十以西南墟為總

卡條上行之由是盜賊斂迹十一年以病謝職歸紳民留之

不得夾道遮送十三年卒於家年六十五子松齡業儒有談

菊山房詩集孫安瀾別有傳據番禺志修

何振剛番禺人由行伍擢廣西平樂左營都司嘉慶四年

蜀寇滋事振剛隨營進勦至雲臺山力戰死之先是二年有

謝朝陞者亦番禺人以撫標左營外委從征川匪陣亡於白

巖山八年事平俱入祀昭忠祠振剛子廕襲雲騎尉朝陞子

廕襲恩騎尉與振剛同時被難者則有撫標營兵邱得富陳

黃朝貴李振龍胡朝泰陳陞杜朝胡有陞馮朝勝陳福區朝明

曾大光鍾廷彩張觀祿俱番禺人其在軍營戰歿者則有撫

營兵郭朝陞鄭朝陞協標營兵朱履泰毛得貴廣協營兵陳奇

昌何文德水師提標營兵徐連高俱番禺人黎有得張得富

韓得陞黃得興鍾英李廣李富俱番禺人嘉慶元年隨征湖

南苗匪陣亡關陞番禺人嘉慶元年從征四川敘匪陣亡
 李福古進傑劉大雄何觀得張朝貴盧觀有梁志深潘榮
 彩潘文俱番禺人嘉慶二年節次隨軍剿湖北敘匪陣亡
 何士德番禺人嘉慶二年從征湖南敘匪陣亡杜社貴許
 金成鄧光祖杜朝福蘇永安何振華俱番禺人嘉慶二年從
 征四川敘匪節次陣亡唐星照黎得何三勝葉得高俱番
 禺人嘉慶五年隨征湖北敘匪陣亡馮閏德陸高黃定邦
 俱番禺人嘉慶六年隨征陝西匪陣亡據阮通志修

吳振亮黃遇龍俱番禺人振亮由行伍歷陞直隸武清營都
 司嘉慶七年隨征四川敘匪至柏森坪力戰死遇龍以永清
 營把總隨營剿匪於湖北亦以是年陣亡八年並入祀昭忠
 祠廕襲雲騎尉其先一年隨征湖北敘匪陣亡者有撫標外
 委杜桂明撫標營兵吳浩林得勝協標營兵賴安俱番禺人

據阮通志修

李仲瑜字朗川原籍新會父某充番禺生員遂佔籍仲瑜亦
 由邑生員中嘉慶三年戊午舉人兩上公車不中遂絕意進

取家居課徒著弟子籍者嘗數百人惟勸以敦品力學故及
 門多醇謹之士性至孝父少不當意輒長跪請訓俟色愉乃
 已館穀所入甘旨外以資諸姊及兩弟少失母事繼母如所
 生篤友誼以匱告立應與李士楨交士楨出恆託以妻子婦
 翁無嗣養之終身喪葬如禮遠近稱人師焉年八十卒同時
 篤實行者朱炳字卓亭亦捕屬人充邑佾生性鄙奢華讀書
 弗輟寒暑敦孝弟謹交遊異母弟幼撫愛教育備極肫摯杜
 門課徒勤勩無倦及其門者多騰達去而炳以布衣終年八
 十一子琛琨皆生員又陳熊者字達璋石樓人歲貢生也為
 人長厚方正不為欺飾人亦不忍欺居父母喪擗踊啜粥不
 離苦次授徒鄉里循循善誘視若己子事寡嫂如母養孀姊
 供給無少缺乾隆末年

國恤至黑其門卧地素食哭泣竟月鄉黨敬慕欲贖金為捐
教職堅不肯曰可俟選期毋勉强為也晚精醫術遇貧者悉
却其謝遠出乘肩輿經神祠輒下步行過祠乃已卒年六十
一子昭亦生員據番禺志修

徐序經字石渠芑洲人嘉慶十五年庚午科舉人性嚴毅重
然諾道光十五年大挑一等以知縣分發貴州到省踰程限
例得處分同寮令其避就序經曰是欺也初入仕遽如是耶
歷署永從印江義興等縣永從有無賴偶傷於火誣富人私
用炮烙刑富人恐賂典史及幕友數百金序經自平反之聞
其賂也擯幕友而檄典史償富人金及調印江永從耆老數
十人欲詣大吏乞留序經要至印江解署慰諭數日乃遣歸
迨調興義興義民抃舞出郊三十里迎之甫攝篆知邑人士

鄉會試路費無出即捐廉為富民倡有逆倫重犯漆幘青者
畏罪投七孔潭死而尸不可得其親屬及邑人士俱願具保
結請完案序經不可竟自劾留縣候緝迨尸浮出而事越年
餘矣邑人士感之延主筆山書院講席數載歸序經倫紀克
敦與季弟序緒最友愛序緒沒哭之慟遂抱沈疴卒以不起
年六十有五序經家本不貧以居官不名一錢歸至鬻遺產
以償宿逋其清操如此據譚瑩撰墓表番禺志修

金菁華字殿選先世浙人宦粵因家焉生甫周歲而父卒母
沈守節撫孤菁華少能自立讀書持論必求其端雖病不廢
學母有未疾侍養備至并博觀醫家言悉心以療母疾竟瘳
嘉慶十四年甲子副榜就教職歷署廉州府訓導博羅縣訓
導永安縣教諭欽州學正能勤其官諸生多所興起豐湖登

峯兩書院膏火及賓興公費皆嘗四出勸助人士無不樂從
 在博羅時知縣王某創集文廟灑掃費菁華喜曰此吾職也
 襄事尤力為人悃悃任真寬和自適至所願為者必盡心力
 不少瞻顧於族黨尤任勞而讓善同邑林伯桐稱其質則能
 勤厚則不忮無意外飾為足多云年五十八卒子錫齡道光
 乙未舉人孫俶基佐基同治癸酉舉人據修本堂稿番禺志採訪冊修
 何烈字執之大石人邑諸生少孤讀書授徒自給不喜為舉
 子業淡於進取視榮利泊如也工詩文尤邃於小學每謂人
 讀書須先識字至於琴曲箏笛歧黃之術靡不洞究性好遊
 凡羅浮鼎湖七星巖西樵悉窮其勝興之所至風雨弗避為
 人方正不阿有不可輒形諸色喜作書求書質詩者無虛日
 所居曰白竹山房陋屋數椽殘書兩案素琴在壁過之者惟

聞啼鳥落葉而已夜少寢即起冬不繇每食以涼水沃飯生

平未嘗病亦未嘗見其有戚容也嘉慶十八年

欽賜舉人年八十餘無疾卒著有白竹山房詩集據番禺志修

劉需字永溥細墟人性孝友嗜學能文歸安姚文田督學粵
 東擊賞其文拔前列劉彬華崔弼諸先輩皆器重之嘉慶二
 十一年丙子舉人二十四年己卯進士歸侍老親不復出執
 親喪哀毀瘠立居鄉以敬宗睦族為志族中嘗構訟連年需
 力為勸導遂式好如初所居鄰十七鄉需以風俗日薄乃建
 議合為深水社小事則鄉自調處大事則合社公議因而嚴
 禁打剛之習打剛者兒童始擲石為戲遂相角勝繼而壯者
 助之往往至械鬪自需立約禁之此風乃絕年三十九卒所
 著有綠陰堂制藝古近體詩若干卷據番禺志修

區昌豪字光賢原籍新會父榕充番禺武生遂為番禺人昌
 豪少失恃祖母潘撫之事祖母以孝聞嘉慶二十一年丙子
 舉人以祖母老不上公車道光二十四年大挑二等授廉州
 府訓導生平飭內行篤師誼急友難其師孝廉李仲瑜病革
 呼其子若孫曰吾不即死以待區君語竟昌豪果至則為摒
 擋身後區畫井井無留憾仲瑜乃瞑目死其友侯玉堂朱斐
 堂之死也皆昌豪經紀其喪居廉州廣教化勵實行六載俸
 滿引歸年六十九卒性平和而介為鄉里推重晚年猶手不釋
 卷著有葆天齋詩文集據詩人徵畧
番禺志修
 洪應晃字仲光其先福建晉江人入粵初居香山小欖有任
 水師左營都司者遷省城遂占籍番禺應晃少穎異讀書數
 行下家屢空而旦夕讀不輟弱冠善屬文兼工詞賦嘉慶二

十三年戊寅舉人禮闈下第歸以親老不復出閉門授徒從
 之遊者歲嘗百十人母病劇應晃侍湯藥衣不解帶者旬月
 父偶不懌即憂形於色親喪哀毀得足疾親諱日未嘗飲酒
 茹葷事伯兄至老不忍析居平生篤友誼嘗從高士左某學
 琴生明其食死為之葬友陳某中年殂謝上有老母應晃代
 營喪葬以餘資養其母有貞女韓不嫁以事父母為措金俾
 贍養之晚得國子監學正銜著有四書約說五卷周禮管測
 二卷青棠館詩三卷雜著一卷讀書偶記二卷年六十五卒
 從子國治道光己亥舉人庚子進士戶部主事國士與國治
 子景琦同中同治丁卯舉人據宋訪
冊修
 段佩蘭字初秋捕屬人弱冠為諸生好學工詩一時名宿多
 折節與交家素饒裕喜賓客篤師友誼性灑落遇佳山水輒

流連忘返香山黃培芳陽春譚敬昭南海孔繼勳同邑林伯
桐黃喬松張維屏建雲泉山館於白雲蒲澗濂泉之間有薌
澗松臺環碧樓南雅齋清湍修竹軒注經窩枕流閣綠陰坵
江景亭橫藤墩坐月坡北園通泉索笑檐穿雲逕松竹壟埋
憂塚諸勝汀洲伊秉綬撰記泐銘稱爲七子詩壇論者謂白
雲自前明陳子壯闢建濂泉以來雲山寂寞幾二百年得此
繼起爲湖山生色佩蘭之功也

據阮通志
番禺志修

梁同新初名綸機號矩亭黃埔人父經國僑居省城西長厚
有隱德以厯次捐輸洊加道銜同新其季子也幼聰穎年十
九中嘉慶二十三年戊寅科舉人道光十六年丙申成進士
選翰林院庶吉士授編修二十六年湖南學政三十年補山
東道御史咸豐二年擢禮科給事中充陝甘副考官晉通政

司參議四年擢內閣侍讀學士同新讀書有識善論事爲御
史時海內查禁鴉片外夷意叵測特疏請飭疆臣示以威德
毋使外國見輕粵匪未起預見其萌奏請嚴禁邪教以絕亂
源又請加意團練先事預防其後變起悉如所料又嘗以南
糧歉收請由上海招徠洋米以裕京倉而足民食前後疏十
餘上皆切於時務性誠樸勤於公事督學典試校閱常漏下
數十刻不少休在楚南所取士如羅澤南王鑫皆當代偉人
其餘樹勲業建節鉞者不一而足楚人至今稱善鑿焉七年
擢通政司副使晉順天府尹固安令濫斃生員案久不決同
新親鞫得實立按罪都中行大錢民不以爲便同新獨請改
鑄以蘇民困八月監臨順天鄉試提調官蔣達以闈中供給
闕少斥責屬吏同新寬大不苛小節意與之左達負氣出闈

揭同新袒護

詔褫達職同新亦撤任以四品京堂候補十年卒年六十一同新精堪輿術數晚益淡泊講求心性以周子主靜為宗著有圖書與義等書子肇璟肇煌肇晉肇煌咸豐癸丑翰林官順天府府尹肇晉同治甲戌進士官禮部主事肇璟子慶奎同治癸酉科舉人據番禺志修

陳其錕號棠溪捕屬人嘉慶二十三年戊寅舉人道光六年甲戌進士即用知縣籤分貴州八年捐主事觀政禮部派儀制司行走充則例館協修官十四年丁艱回籍十七年大府聘主羊城講席遂不出道光甲午乙未間廣東大水當事者議設東西義倉備賑濟自後洋務軍務日起籌兵籌餉大憲必有諮詢故凡省中修文廟辦團防廣考棚修赤崗滘洲二

塔無役不從二十一年勸捐出力以員外郎用二十四年接辦恤嫠局事積盈餘增羨額三十名作專補士孀之缺咸豐元年逆匪滋擾大府邀與眾紳籌餉勸捐至三百萬各省軍需多資於此十一年八月卒年七十主羊城書院二十六年其錕工翰墨善書詩文具有家法著有駢散體文稿含香循咳載酒等詩集月波樓琴言詞集據采訪冊修

馮詢字子良嘉慶二十四年己卯舉人庚辰進士歸班銓用道光戊戌選江西永豐知縣己亥庚子兩充同考官量移浮梁德興縣民抗糧聚眾饒州府檄詢辦治詢單騎往片語解散以首犯歸癸卯復充同考官戊申大計卓異己酉題升南昌府吳城同知咸豐癸丑五月髮賊竄江省委守省垣順化門守城九十三日加運同銜丙辰兼署九江郡篆時郡治暨

屬邑先爲賊踞上官留詢總查河道詢乘小船晝夜梭巡賊箭著船上不顧也是年復攝饒州郡篆詢請募勇六千以行年餘肅清全郡會有蜚語竟撤任詢至省侃侃直陳上官意釋復委辦贛防軍務帶兵會同粵軍勦兩省劇盜事平仍回吳城任時沈保楨方任江撫知其功復列卓薦追叙前勞晉擢郡守而詢以年老請致仕未幾卒年七十六詢勤於吏治凡遇勘驗下鄉館舍夫馬悉自備縣役皆給飯食不飲民間一勺水振興文教加增永豐浮梁書院膏火又捐千金創建永豐求志書院浮梁景仰書院永豐義倉以備豐歉吳城客民厝柩河干歲久暴露詢捐置恆產建塔爲儲骨所每冬至集紳耆開塔取骨裝匣瘞埋定章程使經久詩名滿天下已梓者詩存二十二卷試帖一卷詩錄十卷此外有文存一卷

隨筆一卷藏於家

據子永年行狀修

許祥光字賓衢其先由閩入粵父賡颺始占籍番禺家素豐存心桑梓嘉慶十五年海盜張甚大府命賡颺集紅單船數十募水勇數千月散千金自爲部署敗賊於大洋明年海氛遂平道光十三年七月山水暴發北門不沒者三版賡颺募船救渡人皆從窗櫺引出日炊米十餘石周給之全活無算子十二人祥光其仲也嘉慶二十四年己卯中舉人道光十二年壬辰進士用主事加捐員外郎二十一年廣東洋務起祥光丁母憂家居以紳士經理投效局先後捐軍需銀六萬餘兩復與眾紳勸捐銀百四十餘萬大府奏賞花翎二十二年復捐銀萬兩建九龍城寨議敘以道員卽選時洋人初就撫或與粵民爲難祥光頗能以理論之平其

事二十九年洋人又申入城之約總督徐廣縉巡撫葉名琛令祥光與南海紳士伍崇曜聯集居民廣張聲勢絕其互市並以書諭其酋總督復親赴洋船曉以利害遂罷入城議總督巡撫得

旨嘉獎並膺

錫爵祥光得三品頂戴通省士民亦荷匾額之

賞焉咸豐元年五月選授廣西桂平梧鹽法道時廣西盜起陷踞永安州官軍屢挫賽尙阿以大學士視師駐桂林祥光抵任奉檄由梧州進攻永安率兵勇上古眉峽連日獲捷復與東莞張敬修合攻水竇克之二年二月賊棄永安竄湖南祥光隨大軍追賊至衡州回任並署按察使辦善後隨擢按察使三年五月興安會匪驟發陷踞縣城先是祥光訪聞縣

有匪首雍月耐蔣方海等糾眾爲會檄知縣蔡某密捕得之匪黨知事洩先期起遂陷興安分兩路犯桂林一由北路奔靈川一踞東路長岡嶺入大墟爲夾攻之勢祥光奉檄總兵先勦北路兵勇未集賊已陷靈川縣逼省垣祥光提東勇二百夜馳靈川急攻之賊大潰復靈川城祥光慮東路賊近整旅歸而賊果至水東門外僅隔一河時張敬修亦率兵至祥光遂與登陴捍禦潛遣勇渡河焚賊所踞舖屋賊駭走省城解嚴復率兵勇進攻興安興安知縣蔡某陷賊祥光密令收城中被脅者爲內應於是陽示期進攻而密拔營先期往親自督戰連奪三賊營賊入城死拒城中火起祥光知內應亟奮攻內外夾擊遂復興安獲賊首王苟晚等九人功上加布政使銜四年廣西饑不繼巡撫用祥光議稅鹽梧州並檄祥

光往主之兼勦辦江面諸盜抵梧訪獲著盜羅四肥蝦陳二九等置之法由是江盜稍戢既而廣東土匪起梧當兩廣之衝祥光晝夜防堵以勞疾卒年五十六著有選樓集句二卷子應駮舉人弟禮光字節之候選通判加同知銜家本鹽筴羣從多務讀書取科第禮光乃承家業家中數千指賴其拚擋性節儉惟延師不惜重貲弟姪讀書服食皆同己子已西阻洋人入城之役以通判歸新班遇缺選用時祥光在西省督兵駐潯梧禮光草十策上之復募勇購礮械以待迨羽書乍至援軍已在舟中祥光之有功皆其十策所籌也卒年七十子應駮翰林院侍讀學士現官甘肅學政據番禺志采訪冊修潘仕成號德畚埔屬人家素封慷慨有大志道光壬辰北闈副榜時京師饑仕成捐賑多全活

欽賜舉人報捐郎中供職刑曹海內人士爭延訪之以不識其人爲憾臨桂陳繼昌元和陳鍾麟亦與爲忘年友二十六年放甘肅平慶涇道因督辦七省戰船未竣經粵督奏調近省是年十一月放廣西桂平梧鬱道又因幫辦洋務奏留仕成捐製火礮水雷等器籌防籌饟大吏深倚之敘功加布政使銜二十七年

特旨補授兩廣鹽運使以本籍人監司本籍曠典也仕成不敢當稟大吏固辭乃改授浙江鹽運使以粵事孔棘亦未赴也洋稅章程久未定

命仕成隨

欽差大臣花沙納等往江蘇上海會議歸而養疴里門不復出仕成輕財好義修考棚以便歲科兩試擴貢院以備廣錄

人才捐都門廣宅爲本邑公車會館皆能見其大且急人之急通有無者各如其意以去以故家中落晚歲困鹽車至破其家未幾卒人咸惜其未獲大用於世也好刻書帖嘗翻刻佩文韻府一百四十卷拾遺二十卷集刻海山仙館叢書一百一十八卷共五十六種中多祕籍選刻經驗良方十卷又石刻海山仙館集古帖十卷蘭亭集帖四卷尺牘遺芬二卷士林嘉賴焉子桂辛酉舉人壽齡補行乙卯科舉人據采訪冊修劉殿相字賜舉嘉慶六年由行伍入香山左營時海盜蜂起大府檄殿相帶師船數十出洋分剿鄭一吳知青麥有金郭婆帶等前後著有勞績補用本營千總加守備銜嘉慶十三年冬偵知賊聚老萬山孖洲等處乃刻期分船進賊悉眾出拒我軍薄之殿相大呼以火藥筒擲焚賊舟賊大懼將遁帆

爲火箭所熟不得動我軍復以石灰四圍潑射賊目不得啟而仆遂躍入賊舟斬賊無算俘獲三百餘名萬山孖洲次第克復殿相乘勝率戰艦駛至潮州海面聞賊蔡牽入揭陽騷擾殿相直前迎擊連戰數日賊艘大至我軍無繼者殿相奮戰至日中至死猶手刃數賊時十四年二月二十四日也

年三十九

據番禺志修

梁國熾字輝上黃埔人少孤事母謹飲食疾病必躬親之痘症盛行多死者國熾憫之聞西人有種牛痘法取牛所患痘漿刺人臂令痘出數日卽痂無所苦國熾乃以重金購其法習之痘漿必由西洋傳遞而至費不貲國熾無所吝歲以其法治之至今人人知種痘中國得免痘患自國熾倡之也性儉樸縑袍布被而裕祖嘗濟鄉族助婚葬賑凶荒爲之不倦

年五十七卒子六人韜守備其洞普甯教諭

據梁同新撰家傳采訪冊修

陸殿邦字達泉穗石人嘉慶二十四年己卯舉人性至孝道

光六年大挑二等借補吳川縣訓導以母老不赴課徒以修

脯養殿邦伉直能任事雖處里閭而留心世務二十一年總

督祁墳聞其名以禮延訪殿邦為畫防海之策咸豐四年紅

賊之亂殿邦與贊善何若瑤設局平賊事見若瑤傳六年餘

匪乘夷變復竄據彬社殿邦走沙菱各鄉請援乃親援桴鼓

率鄉勇乘夜渡江凌晨登高埠擊鼓賊大驚潰乃盡焚賊舟

彬社各鄉賴以安堵叙功擢高州府教授同治初年信宜失

守賊圍高州府殿邦日在圍城中課諸生不輟同治四年以

老去官歸與修縣志未完而卒年七十八著有文集一卷大

學臆中庸通論孟述四書故共十卷子萬培舉人

據番禺志修

崔自超本名羣字睦堂員岡人道光二年壬午舉人少凝重

竟日端坐眾異之二十一年洋人犯省城鄉落匪類乘間竊

發自超鄉居賊六十餘人劫大石假道員岡盡為鄉人所獲

時省城被圍不得送官自超乃令鄉人沈賊於海賊黨聞之

率三千餘人攻員岡欲乘間恣掠自超堅壁不動窺賊稍懈

遣壯丁三路擊之板橋市頭大石禮村各鄉勇亦至賊大潰

生擒五人擊斃數十人由是賊匪悉散鄉間得以無事二十

四年自超以大挑二等授靈山縣訓導卒於任

據番禺志修

何若瑤字石卿大石人父森以父久客交趾弱冠獨往尋之

山水漲發瀕危者數卒迎父歸居鄉視眾事如已事晚年尤

急人之難邑文廟修建眾推森肩其事性明決可否立辦無

所徇人皆重之若瑤少穎悟讀書日數十行十三經皆能成

廣州府志 卷之二十一
誦十一歲居母喪哀毀如成人道光七年戊子舉人七赴禮
闈二十年大挑二等選海康訓導二十一年成進士
殿試二甲第一名改庶吉士散館授編修二十八年

大考記名以贊善用咸豐三年丁繼母憂歸遂不出四年紅
賊亂變起倉卒若瑤鄉居擬團練幾被害乃微服走會城圖
勦賊是時賊氛正熾沙灣則何博份鍾村則李阿繼猛涌則
林洗隆新造則陳顯良其黨佈散村落者以萬數又有賊艘
千餘往來內河城鄉聲息不通若瑤乃與候補道梁綸樞請
於制府開局城西籌餉募勇於是沙灣菱塘兩屬紳士稍稍
出集五年正月遂同官軍進攻若瑤遣練勇直入大箍圍之
市頭扼其中樞各鄉義民羣起相應神頭猛涌新造諸賊一
鼓蕩平若瑤復與紳士定議移局南村安集善良搜捕餘匪

改局爲廣南書院以總沙菱兩屬之事大吏嘉之擬獎敘若
瑤辭悉以讓諸同事知縣李福泰深重之六年延主馬山講
席並總纂邑志發凡起例未成書而卒年六十若瑤爲人靜
默恬淡遇事鎮定有執事成而已若無所與未獲大用於世
識者惜之生平勤學嗜古所著有公羊註疏質疑兩漢考證
海陀華詩集文集等書

據番禺志修

黃子高字叔立號石溪河南人少以詞章擅名年二十補縣
生員益留心掌故攷證金石藏書甚富善書尤精小篆用筆
如鑄人得片紙爭藏弄焉道光十年督學翁心存以南海對
試諸生子高立就千餘言督學驚異謂足與揚州汪中廣陵
對並美十一年辛卯遂以優行貢太學總督阮元重之拔爲
學海堂學長子高性平和而行介某道盧某都統奕湘慕其名

折節造廬竟不得見惟與順德梁梅南海譚瑩胡調德嘉應
吳蘭修同邑居鏗儀克中侯康為文字交顧屢困鄉闈年僅
四十六而卒人咸惜之著有石溪文集二卷知稼軒詩鈔九
卷續三十五舉一卷粵詩蒐逸四卷生平尤重桑梓鄉邦文
獻葺綴甚勤子鴻遠篆隸有父風子高歿後鴻遠亦卒所藏
書今散失盡矣據譚瑩撰墓志知稼軒詩鈔諸跋翁校士錄修

儀克中字協一其先山西太平人父墳以鹽知事分發廣東
卒歸葬太平克中與兄克已奉母返粵居遂為番禺人克中
少有奇氣讀書經目成誦嘗出市縱觀告令歸而不遺一字
人咸異之嘉慶三十三年與修廣東志搜訪碑刻多翁方綱
學士金石畧未著錄者學海堂課士克中和方孚若南海百
詠一夕就總督阮元甚材之海康陳昌齊錢塘錢儀吉仁和

顧廣圻甘泉江藩皆折行輩與論交高麗客卿李某遇之京
師傾倒甚至後克中歸萬里郵詩索和名愈起道光十二年
壬辰侍郎程恩澤來典鄉試披遺卷得所對策大賞之遂中
選克中倜儻尚俠益讀書有利濟志十四年廣州官窰大水
決隄民居蕩析值克中南還巡撫祁墳耳其名延為記室因
言水患非濬靈洲渠勢不可殺撫軍深倚之遂與南海曾釗
親歷石門至蘆苞河相度沙水三閱月工蕪克中積勞疾幾
不起久之小愈則又念丙丁龜鑑言請建惠濟倉經畫周年
時達旦不寐竟卒年僅四十二歿後所著散佚祁撫為搜葺
文集一卷詩集九卷俾其子存於家據曾釗撰墓志番禺志修
黃玉階字季升捕屬人道光十二年壬辰舉人十六年丙申
成進士官刑部主事以母老乞養南歸年四十一卒著有韻

陀山房詩文集八卷宣蘇室詞鈔一卷遊仙唱和詞一卷玉階少溫雅有聲庠序嘗讀鄜露赤雅作詩三十三首爲時傳誦工駢體嘗以南城會煥所選駢體正宗多遺畧乃廣搜博采擷其精者爲續編又以粵東詞學頗少專家約諸詞人於學海堂創爲詞社選題校藝排月舉行又嘗議重修城南大忠祠明南園前後十先生舊社也未果而卒時同里以詞賦稱者虞必芳字子馨獨擅駢體文一時女人無出其右道光二十五年夏提學署前演戲不戒於火男女死者三千餘人好事者收其骸骨共冢葬之必芳擬清明祭共冢文數千言時以比江都汪中哀鹽船之作七應提學試錄取古學者再卒不得青一衿而卒年三十二沈世良字伯眉博雅嗜古詩學吳梅村尤以詞得名所著有小祇陀盃詩其楞華室詞兼

玉田石帚之勝爲諸生十年亦以貧病至三十餘歲竟卒同時許玉彬字清皋吳瀛字潮生皆諸生蔣灝字霜漁監生皆有集問世抱才不偶視玉階尤可悼云

據楚庭耆舊集松軒筆談番禺志采訪冊

楊榮緒原名榮字黼香捕屬人少通經學精究說文尤工駢儷語年十六受知學使白鎔補弟子員元和陳鍾麟主講粵秀賞其文與順德盧同伯南海桂文耀同邑陳澧有四俊之目道光十五年乙未舉於鄉充學海堂學長屢因公車歸而授徒歲常過百人庚戌第二人許其光己未第三人李文田辛未第一人梁耀樞三鼎甲皆出其門一時傳爲盛事咸豐三年癸丑成進士改庶吉士散館授編修九年考取御史大考翰詹二等第九名

記名遇缺題奏十年補河南道御史時戶部尚書肅順導
駕幸熱河意叵測與同官抗疏請

迴鑾又奏參贊國瑞飭法營私撤之回京風裁大著十一
年轉掌四川道調掌河南道幫辦五城團防事在詞館屢充
國史館協修 武英殿總纂己未辛酉充順天鄉試同考官
在諫垣歷署京畿道廣西道擢刑科給事中禮科掌印給事
中同治二年擢浙江湖州府知府湖州經亂以來流亡載道
骸骨滿野田既荒廢糧冊無存民無以生多棄女不育士失
學久文風蕪弱不振郡故濱湖滙天目諸山之水舊設三十
六澗以資宣洩至是亦皆淤塞榮緒至則請帑葺城垣建考
棚興復廣仁堂於峴山等五處起義塚三十五座掩全骸數
千具零骨數萬觔置善後局設廠施粥流亡得食漸歸復業

於是課民樹藝貧者給之桑種地利大興乃清釐糧務有主
者責以正供無主者招徠開墾就近之烏程歸安德清三縣
於四年卽試辦開徵其長興武康安吉孝豐四縣陸續接辦
數年之內元氣漸復銀漕比舊有加焉重建府學烏程 文
廟重葺歸安 文廟造倉廩儲穀萬石以備凶荒復郡城育
嬰堂創設南潯長興荻岡育嬰堂又令各屬設留嬰接嬰公
所收育者萬餘人其三十六澗之淤塞者集紳耆親行履勘
請帑疏浚立歲修章程自後港汊深通水患遂息榮緒老於
文尤以文教爲急務先於愛山書院添設小課親爲評閱人
士翕然推服續建安定書院又於各書院增設膏火籌賓興
之費士風丕振凡所興建皆委官紳不假吏閭洗手奉公素
性然也初莅郡餘賊尙結黨馳捕其魁置重典黨徒遂散值

歸安閩漕縣令奔府署榮緒親率往倉勸諭糧戶見太守至皆拈香跪迎事竟帖然生平痛絕苞苴舊有輜車船埠供應官府至則裁革自都回屬員窺其囊罄進以金峻却之俗重饋壽生辰各官皆具壽障為禮惟收上下款字餘則璧返經厯余某私爇燭於二堂叩祝而退不使知也榮緒曳履出燭尚燃詫問誰何家人以經歷對榮緒曰足矣即命滅燭送還且告之曰如此已足過則不敢當也其節操如此在湖十年嘗膺卓異薦報捐軍餉復以道員在任候選然終不遷也甲戌卒年六十七有湖濱老農率其鄉人來哭蓋蘇州與湖交界亦受其惠焉靈輅返粵士民哭送稱好官者不絕樹碑於峴山之麓題曰使君活我又臚其宦蹟請祀名宦光緒二年十二月二十五日得

旨允行所著有十三經音義考左傳博引蒞郡後精研律例凡案皆親批發又仿唐律疏義例詳註律例與未編之詩文集并藏於家子近光乙卯科舉人內閣中書先卒近仁辛酉科舉人候選教諭加內閣中書銜現充菊坡精舍監院據湖州請

祀名宦冊及行狀修

侯康字君謨其先江南無錫人祖金鉉遷廣東為番禺人康幼孤好學喜買書母張為稱貸得錢買十七史讀之卷帙皆徹遂通史學讀南北朝諸史所載文章好之為文輒敷其體間亦為詩有惜燭山房詩草總督阮元時開學海棠課士賞其文由是知名後乃研精經學時稱經師焉其史學於隋以前尤精熟正史之外旁搜羣籍網羅放佚考其同異欲仿裴松之注三國志例盡注隋以前諸史嘗曰

國初以梅氏天文算術諸書顧氏讀史方輿紀要李氏南北史合鈔稱天地人三奇書論者謂李氏未可鼎足吾書成其將取而代之乎又曰注史與修史異注古史與注近史異史例貴嚴史注宜博注近史者羣書大備注古史者遺籍罕存當日爲唾棄之餘今日皆見聞之助宜過而存之爲後漢書補注續三國志補注後漢稱續者以有惠定宇補注三國志杭大宗補注未爲完善故不稱續焉又以隋以前古書亡佚著書者多湮沒不彰乃補撰後漢三國晉宋齊梁陳魏北齊周十書藝文志而自注之凡其人不見正史者考其爵里書已亡而逸文見於他書者著其梗概後漢三國成經史子三部餘未成尤好左氏傳近儒多尊賈服而排杜解然杜固有勝賈服者儒者說經當求心之所安毋徒博好古之名欲著

書以持其平亦未成又治穀梁傳考其涉於禮者爲穀梁禮證其餘羣經小學皆有論說多前儒所未發又考漢魏六朝禮儀數十篇皆可傳康事母孝友於兄弟篤於朋友性兼狂狷而質直通易與俗無忤喜飲酒招呼朋好諧謔間作逸興橫發不治家人生產至不識算子以授徒自給終其身由優貢中道光十五年乙未科舉人卒年四十四據陳澧撰傳楚庭耆舊集修侯度字子琴樸誠謹厚耽研經學尤精算術道光十五年舉人與兄康同榜時稱二侯二十四年大挑一等分發廣西以知縣用署河池州知州居萬山中無城郭經寇躡甫收復度履任卽分遣紳耆相度地勢擬因險築柵以代之爲河池百年之利又河池土匪多從賊劫掠度立保甲團練章程十餘條復仿趙廣漢筭法使民相告訐俟發十家牌後按名

擒治惟甲長是問不使差役賄縱經畫甫定有南丹土目莫遺忠者交結胥役爲民害民控於府州皆不爲理度立逮之遺忠急遣人詣省稱自備經費募勇報效誣度翻已結舊案押勒銀兩控於大吏及知府知府某銜度素無饋遺遂據遺忠誣詞請撤度任大吏不察亦檄度詣省質問於是匪黨乃張筵宴客并及衙役蓋自料其名在箚中喜度去而莫之發也度詣省問官某廉其枉力白於院司事乃解然河池規畫莫與爲繼民皆以爲恨矣既而賊犯桂林度奉委防堵露處城上晝夜不懈者數月賊退將敘勞列薦牘而當路者以事削職寢不行度素悃愾年過強仕始得一官方思展布而猝遭橫逆不無介介奉檄署修仁不赴遽告病歸抵里僅半月鬱鬱竟卒知者莫不傷之生平著撰僅散見學海堂前後集

中其述古堂家訓二卷亦存子目而已

據番禺志修

孟鴻光字蒲生本山西人父某挾重貲客廣東因好施耗其貲卒鴻光不能歸遂籍番禺入縣庠鴻光少強記讀書有得摘鈔貼壁間日閱一編至後月朔則易去由是記誦浩博通小學好金石文字能爲篆隸尤工刻印道光十四年甲午科首題爲子謂子夏曰二句鴻光以子夏通五經立論用水經注子夏石室事場中詫未有遂中式同邑侯康嗜古士也嘗與論小學及凡將佚文鴻光誦之無遺誤且言所出康畏服之詢以註疏則十三部徧讀之矣其實學如此顧性通脫好戲談屢躓場屋遂頽放後復不第晚生子又殤落落無歡爲詩文多譏切時事未幾遂卒論者惜其學而悲其遇云

據陳澧撰

廣州府志 卷一百三十一 列傳二十
陳泰初號見田南陽知府仲良長子也道光二十三年癸卯
舉人二十五年乙巳進士由編修援例選廣西平樂府知府
時廣西盜賊蹂躪久平樂尤殘破兵單餉乏劇盜環伺親友
聞信爲之黯然泰初獨慷慨赴任成豐八年十一月抵省謁
大吏力陳平樂爲梧桂通衢亟宜措置連梧州以隔絕開封
賀縣下郢各賊不使與修仁荔浦潯柳之寇相通抵任卽修
造軍械礮火增募兵勇城守以固時潯柳陷賊貨販稀少乃
建招商抽釐承餉之策於平樂江上下關募置水勇礮船徼
巡昭平一帶并移會梧州先攻撲下郢賊平樂江於是肅清
貨舶通流關課日裕兵餉藉以不乏修荔永安之賊張某者
以蓮塘爲老巢與郡城最近時時來犯泰初策賊出有三路
其馬嶺永昭兩路有鄉團扼拒惟中路空虛乃駐屯雞冠梁
栗木等處撤城中兵出守江岸賊果大修木排傾巢出陷職
思堡順流而下泰初調兵迎擊大挫其鋒張賊負重傷焚排
遁歸泰初思乘勝入穴適勦賀之軍以餉缺潰賀賊乘勢出
泰初知團總劉鴻生可用檄令扼險鴻擊賊退乃上其功給
五品翎頂諭使間賊賊黨羅某率所部反正賀賊始回巢而
潰軍抵城肆掠泰初復出城安撫罄數千金分給之始散去
於是遣人諭張賊以禍福賊猶豫泰初力請大吏增兵往勦
九年六月大吏以兵三千付泰初泰初遂進營青山直逼蓮
塘老巢張賊悉修荔之黨回救是日卽收復永安城修荔陷
賊諸村亦同反正攻勦連捷進屯三窖各處斷賊接濟期入
秋燒山痛勦張賊勢窮乃勾結恭城楚賊乘虛犯郡冀撤蓮
塘兵回救泰初聞之寓書回城囑其弟泰裕與眷屬死守勿

為動援兵集楚賊果退然以是故蓮塘之兵未克直進泰初憤懣甚時率數十人巡視諸營夜常三四起乃疾作未及秋而卒大吏深惜之以軍營立功病故請贈太僕寺卿銜廕一子知縣泰初性孝友隨父任四川二十年淹貫墳籍通達吏治有父風著有問月樓詩文稿存於家子偉宗廕知縣同治癸酉順天舉人維岳光緒乙亥舉人據番禺志采訪冊修柳承祖字式穀沈懷禮字和圃捕屬人均以孝稱承祖歲貢生八旬餘猶健同治丁卯

欽賜舉人辛未會試

欽賜翰林院編修懷禮道光癸卯舉人以母老不上公車承祖創同善堂與懷禮敦善行而不忘如放生施藥施樁諸善舉行之數十年如一日承祖年九十六卒懷禮年六十八卒

懷禮子史雲道光庚戌翰林在籍勸捐加侍講銜主講越華

應元兩書院先後凡九年卒年五十章雲同治癸酉舉人羊城書院監院承祖子超庠生孫芳光緒丙子舉人玉瑄庠生

據采訪冊修

何壯猷號桐圃沙灣人天資聰敏博覽羣籍善屬文涉筆千言汨汨不能自止尤長於詩賦駢體文并通算學中道光二十三年舉人遇事膽決有為咸豐壬子身率鄉勇從官軍勦辦西省匪股軍功保舉知縣甲寅乙卯間紅匪滋擾劫掠村庄人心洶洶無固志壯猷集眾團練外防內靖鄉里賴以安堵編纂邑志未蕝事而卒論者惜之據番禺志修

陳良驥字德斯由武生入伍補外委勦連川匪將兵者喜其勇拔補新會左營把總復從營弁圍捕大雁山盜以功調順

德協左營把總記名以千總擢用咸豐四年紅賊四起六月潛至會城北二十四日副將崔大同聞報倉猝率兵出抵牛欄岡方樹營柵村民聚觀不知皆賊也突起戕大同全軍覆沒良驥與焉事

聞卹其子元昌襲雲騎尉

據番禺志修

屈超羣字載光莘汀人幼習弓馬由馬戰兵補把總道光十九年禦夷新安不避鎗礮總督林則徐嘉其勇以千總儘先拔補二十三年補左營千總署右營守備黎安瀾字濟清大經孫也年十四卽善鳥鎗能挽強弓發必中的稍長由行伍勦捕東莞土賊道光二十一年洋人踞城北礮臺安瀾發鎗斃其酋勦捕清遠賊朱亞華鄧十萬及羅境賊凌十八安瀾皆在行間以功賞千總頂戴巡撫葉名琛駐韶州委安瀾督

運各營糧餉軍械以勞擢外委把總咸豐四年五月紅巾賊起犯省城六月二十四日副將崔大同遇害超羣與安瀾及額外外委嚴政朝余兆清奉委率兵禦賊分營於城北連戰皆捷迭有斬獲是時賊踞佛嶺市爲大巢分踞牛欄岡將軍坑等處超羣與安瀾謀搗賊穴七月初一日約諸營曰明日必殺賊而朝食怯者勿往初二日遲明各營悉出安瀾與弟安淮俱超羣分兵出大北路約至牛欄岡會路遇賊皆敗之逐北過三元里抵牛欄岡殺賊無數賊殊死鬪超羣率兵奮擊賊大潰眾議焚賊營安瀾曰先燬此兵必思掠而懈不如更撲將軍坑然後以次焚之超羣以爲然於是率兵抵將軍坑又破之遂焚賊營安瀾乃語超羣曰君守此爲我後援我當入佛嶺市破賊大巢可一鼓滅也遂拔隊直抵佛嶺市賊

悉走方舉火焚其巢賊忽大股遶出將軍坑攻超羣圍之數重超羣力戰死余兆清嚴政朝馳救亦死賊遂進圍安瀾呼曰前高大帶白頂者斃吾黨最多急擊勿失安瀾聞之拔刀以鞘與安淮曰吾祖勤川楚教匪十餘年未嘗退避我烏可苟免辱先人汝速歸侍祖母與父見鞘如見我矣遂繫冠纓提刀直前自辰至未手刃數十賊而死年僅三十政朝字星階由撫標馬兵賞記委頂戴道光三十年八月隨巡撫葉名琛勦英清盜連戰皆捷執大旗逐北至翁源生擒盜首拔補右營額外外委賞戴藍翎咸豐元年六月隨總督徐廣縉勦高州賊二年復隨總督往湖南歷著勞績記名以千總用亦番禺人也是役也安瀾超羣政朝兆清俱奉

卹典給雲騎尉世職恩騎尉世襲罔替據番禺志修

姚麟字榮爵北村人由武生入營充馬戰兵善擊刺總督盧坤令以記委頂戴教習各營道光二十一年洋務起麟奉檄督勇防堵并捐築礮臺議敘以千總拔補二十二年引見奉

旨發交直隸總督納爾經額派令教習營兵期滿回營補永靖營把總調署大瀝汎把總二十五年補四會營廣甯城守千總二十六年擢羅定協西甯守備咸豐元年補高州都司時高州盜凌十五聚匪萬餘盤踞東西兩路六月麟奉檄率兵由白雞嶺進二十六日與賊相持自卯至午賊眾兵不能支數百人陷賊中麟獨運矛力戰出數百人於陣總督徐廣縉亟獎之令獨當西路麟築長圍斷賊接濟破賊墟連破礮臺七座獲賊首并偽軍師一人總督奏請以遊擊陞用戴花

翎隨調赴廣西至湖南解道州城圍賊走圍長沙咸豐二年十一月十九日麟追至截獲其偽軍師某殺賊百餘賊盡走湖北陷武昌麟率親兵三百追之十二月至武昌攻賊洪山破其礮臺四力戰三日大軍始至三年正月賊走安慶二月陷江甯統兵大臣向榮令麟率勇同援江甯賊據紫金山為守三月二十六日麟攻之奪其營奉

旨賞四喜扳指一七月奉檄回粵募勇船以與地方官捐辦兩歧革職回營効力四年上海陷江蘇巡撫吉爾杭阿留麟於上海軍營克復上海縣城開復原官并拜荷包之

賜旋提捷勝軍於鎮江府城攻克九華山賊壘十一月克鎮江南門城礮臺以叅將陞用六年調守下蜀街偶出巡哨遇賊大至力戰而死奉

旨給雲騎尉世職恩騎尉世襲罔替

賜祭葬入祀昭忠祠麟為人儒雅好讀史能詩擅書公牘文移皆自作不假手吏胥有膂力所持藤牌四十餘觔人稱文武才馭下恩威並濟能知人提督馮子材總兵戴文英皆所收部曲下蜀街之役有勸麟急走可脫者麟曰此正我報

國日也遂死子尙忠襲職

據番禺志修

崔連陞字包裕舉人弼子也家世文學連陞獨充行伍巡撫朱桂楨見其廉謹頗重之八排之役奉調隨營一日賊逼營至將傷病且死眾思潰散連陞不肯去力戰一晝夜援兵至賊始散事平論功擢撫標右營把總旋升千總充撫院武巡捕咸豐四年紅巾賊亂守禦城北并隨營收復佛山新造順德縣城肇慶府城俱有功先換五品頂戴以守備用時廣西

平南尚有賊數萬大府以連陞老於戎行遣率兵往平南山嶺險峻灘瀧湍惡客兵不習地利當道促之戰連陞焦勞成疾代者至可以返矣會連戰不利連陞慨然曰吾不得一勝何以覆命遂力疾督陣賊大至死之時五年八月十一日也

據番禺志修

蘇海字開燎棠下人道光辛丑統水勇得六品頂戴二十三年捐鑄火礮議敘把總銜咸豐二年隨巡撫葉名琛勦賊羅鏡旋檄防守樂昌曲江敘功賞藍翎四年紅賊起東莞同都司黃者華率兵克復旣而紅賊四起攻省城蔓延佛山陳村官窰及各府縣臬司沈棣輝率師四勦倚海為左右手合以舟師為大瀝練勇聲援扼賊進省要路賊不得前十一月棣輝進勦佛山海以間說賊不守瓜步礮臺官軍遂得直攻佛

山賊盡潰正月復隨棣輝攻復新造五年二月攻復陳村追賊至容奇殲之三月授香山協左營千總仍統舟師隨棣輝由容奇克復順德四月追賊九江沙口至思賢滘沈賊船二百餘艘擒斬數千餘賊收復西南墟解三水城圍復肇慶府城轉戰北江復收英德解韶州城圍戰功特著六年九月洋人寇省垣燬各礮臺海奉檄與戰於白鷺潭虎門鹿步滘獅子洋迭有擊獲補平海營守備換戴花翎七年七月西省梧州府被賊制府檄海赴援海以賊據上游江水方漲請持重制府聽人言促之戰海乃歸辭其母集舟師痛飲誓必死遂統師抵德慶賊艘順流衝突我舟不得泊為賊所逼師遂覆麾下勸海走者海曰早知此何避為奮臂大呼殺賊賊擁至執海海罵賊不屈死之年四十一事

間贈都司銜子祭葬祀昭忠祠查取事蹟宣付史館廕其子

雲騎尉世襲恩騎尉

據番禺志修

王振高字本彥碧沙人豪邁有俠氣由行伍拔補外委援例捐都司署香山協左營復調署南韶連鎮中營都司道光己亥以禁煙案謫戍新疆咸豐二年赦歸三年委勦猪頭山匪賞復六品頂戴四年紅賊陷東莞大吏委振高收復既而大緇圍李阿計林沈滌又起振高勦之遇害得

旨開復原職給雲騎尉世職恩騎尉罔替長子榮德年二十餘官督標把總奉委赴廣西梧州勦捕抵鳳凰岡遇賊力戰陣亡卹如其父

據番禺志修

蕭裔靈字鴻開蓼涌人販魚為業咸豐八年二月洋人陷城後強買魚菜凌虐市人裔靈激義憤持魚刀斬洋人歸抱母

哭洋人不知為誰勒地方交兇裔靈慨然自首被刑而死年三十母哭子不一年亦死宗族贖其屍葬焉過者為之出涕

據番禺志修

袁灝字石根捕屬人乾隆戊申舉人袁次之次子也善書法屢試不售報捐貴州縣丞委署按經勦匪屢獲勝仗敘功以知縣補用旋授貴州遵義縣咸豐九年委署安南縣十年四月十八日勦匪陣亡給雲騎尉世職恩騎尉罔替子鏢字少石從九品兼襲雲騎尉同治六年委署廣西融縣典史代理融縣事賊陷城全家殉難卹典如其父九年祀廣西昭忠祠

據采訪冊修

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十一終



